



Broj: 01/1-02-1093/21  
Ilijaš, 27.05.2021. godine

**Z A P I S N I K**

sa 6. sjednice Općinskog vijeća Ilijaš, održane dana 27.05.2021. godine, sa početkom u 10:00h.

Sjednicom Općinskog vijeća Ilijaš predsjedavala je predsjedavajuća Općinskog vijeća g-đa Alma Omerović.

Prisutni vijećnici:

<b>RB.</b>	<b>IME I PREZIME</b>
	<b>SDA</b>
1	ALMA OMEROVIĆ
2	ANEL BUMBULOVIĆ
3	MEHMED SINANOVIĆ
4	ELMA MASNOPITA
5	ALEN HASKOVIĆ
6	ALEN ARNAUTOVIĆ
7	ADEM ALIĆ
8	HALID DIZDAREVIĆ
9	SEID BEKTIĆ
10	KENAN HASIĆ
11	SEMIR DEDIĆ
12	DENIS DILBEROVIĆ
	<b>NIP</b>
13	VERNEŠA BEŠLIJA
14	ALMIR ŠPIODIĆ
15	KENAN BUZA
16	DINO ČUSTOVIĆ
17	ADNAN ABADŽIJA
18	AMINA RAMIĆ
19	MEHO HIDO
20	ALEMA DŽAFO
	<b>SDP</b>
21	ALAN ŠERAK
22	ANELA SUBAŠIĆ
23	SELMA BARIĆ
	<b>SBB</b>
24	AKIF BEŠLIJA
25	MUHAMED HANDŽIĆ

Prisutni gosti:

1. Denis Kahrman - predstavnik Uprave za šumarstvo
2. Halil Sulejmanović - v.d. izvršni direktor KJP "Sarajevo-šume" d.o.o. Sarajevo
3. Kenan Gačanović - komandir Odjeljenja kriminalističke policije Ilijaš
4. Admir Kahrman - predsjednik Udruženja poljoprivrednih proizvođača FBiH
5. Aida Kevrić-Muratović - Radio Ilijaš
6. TV Vogošća

Ostali prisutni:

1. Akif Fazlić – općinski načelnik
2. Ilda Kahrman – sekretar OV-a Ilijaš
3. Merima Osmanović - pomoćnik načelnika
4. Nizama Mališević - pomoćnik načelnika
5. Nedžad Masnopita - šef Odsjeka za budžet i trezor
6. Enisa Mešetović - stručni saradnik za obrazovanje, pitanje mladih i NVO sektor
7. Maida Habibović – zapisničar
8. Mirza Dinar – IT administrator

Predsjedavajuća je otvorila sjednicu i konstatovala da je prisutno svih 25 vijećnika. Zatim je dala na razmatranje Zapisnik sa pete sjednice OV-a. Primjedbi nije bilo, pa je OV-e jednoglasno usvojilo Zapisnik sa pete sjednice OV-a Ilijaš.

Pročitala je predloženi dnevni red i napomenula da je Komisija za izbor i imenovanja razmatrala i Prijedlog Odluke o raspisivanju Javnog oglasa za imenovanje 1 (jednog) člana Općinske izborne komisije Ilijaš, a veže se za tačku Prijedlog Odluke o razrješenju člana Općinske izborne komisije Ilijaš Senade Hadžimehmedagić. To je tehničko pitanje i da ne bi smo čekali slijedeću sjednicu, Komisija predlaže da se ova tačka uvrsti u dnevni red, a prema uputama Centralne izborne komisije BiH se ove dvije tačke dnevnog reda provode. U tom smislu predlažila je da ova tačka bude poslije tačke Prijedlog Odluke o razrješenju člana Općinske izborne komisije Ilijaš Senade Hadžimehmedagić. Predloženi dnevni red dala je na razmatranje.

ALMR ŠPIODIĆ - vijećnik NIP-a

Zašto na dnevnom redu nema tačke dnevnog reda raspravljanje o referendumskom pitanju gdje smo po Statutu Općine Ilijaš u februaru na drugoj sjednici OV-a pokrenuli (jedna trećina vijećnika) da se raspravlja vezano za mjesne zajednice. Po Statutu Općine Ilijaš član 27. obavezujete se da ste trebali tu tačku staviti u dnevni red na razmatranje. Dakle, zašto nema te tačke, a prošlo je četiri mjeseca?

ALMA OMEROVIĆ - predsjedavajuća

Kolegij je dobio odgovor od nadležne Službe i obzirom da smo imali malo vremena, a vaš šef kluba je bio na sjednici Kolegija i pročitala dopis službe i na narednoj sjednici Vijeća ćemo to imati na dnevnom redu uz pripremljen prijedlog Odluke.

MUHAMED HANDŽIĆ - vijećnik SBB-a

Na dnevnom redu smo dobili Informaciju Sedme policijske uprave - Policijska stanica Ilijaš, a ja informacije o stanju sigurnosti ne vidim. Vidim samo odgovore na neka

vijećnička pitanja i ovo nije akt koji se zove Informacija o stanju sigurnosti na području Općine Ilijaš, što je za nas interesantno. Pretpostavljam da će na sjednicu doći lice koje će prezentovati Informaciju, ali iz ovoga nismo mogli ništa vidjeti. Ne znam da li ovo uopšte razmatrati dok ne dobijemo sadržajni akt koji oslikava stanje sigurnosti na Općini Ilijaš.

ALMA OMEROVIĆ -. predsjedavajuća

Predlažem da ova tačka ostane na dnevnom redu, pa ćemo onda diskutovati. Zaključak smo uputili prema VII PU-PS Ilijaš, a ko je trebao da nam dostavi Informaciju postaviti ćemo pitanje i dogovoriti se o daljem postupanju vezano za ovu Informaciju.

ALAN ŠERAK - vijećnik SDP-a

Vezano za tačku Informacija Sedme policijske uprave - Policijska stanica Ilijaš, nekada davno smo govorili da Informacije budu na kraju dnevnog reda sjednice. Obzirom da kao 3. i 4. tačku imamo Informacije, a posebno tačku Informacija iz oblasti šumarstva, predlažem da tačku 10. Informacija Sedme policijske uprave - Policijska stanica Ilijaš pomjerimo na 5. mjesto da ih grupišemo da Informacije budu objedinjene.

Vezano za tačku 9. Prijedlog Odluke o razrješenju člana Općinske izborne komisije Ilijaš Senade Hadžimehmedagić, prema informacijama kojima raspolazem mandat ostalim članovima OIK Ilijaš ističe slijedeće godine, a obzirom da je izborna godina, njima će se po Zakonu, silom prilika, produžiti mandat, jer u izornoj godini ne možemo mijenjati članove ove Komisije. Ovim putem želim da predložim da ovu tačku uvrstimo u dnevni red i razriješimo sve što treba i pristupimo izboru nove Općinske izborne komisije iz razloga da nemamo debalans u vrijeme trajanja njihovih mandata.

ALMA OMEROVIĆ -. predsjedavajuća

Od CIK-a BiH smo dobili dopis za razrješenje člana Komisije kojem ističe mandat, a za ostale članove nismo dobili ništa. Ono što možemo učiniti jeste da postupimo po onome što smo dobili od CIK-a BiH, a da nadležna Služba uputi dopis CIK BiH o daljim postupanjima vezano za ostala dva člana OIK Ilijaš. Smatram da ne možemo staviti na dnevni red nešto što nismo dobili potvrdu od CIK BiH.

ALAN ŠERAK - vijećnik SDP-a

Naravno, oni nas neće obavijestiti sve dok članovima OIK ne istekne mandat. Ja sam bio član izborne konkursne procedure i znam da im iduće godine mandat ističe tj. sedam godina navršavaju iduće godine. Da ne budem sada isključiv ili isključive prirode, hajde da to provjerimo, nećemo zakasniti, pa da to pripremimo za slijedeću sjednicu OV-a. Smatram da ta godina nije upitna, mi njih možemo razriješiti kada god hoćemo, a po pitanju njihovog rada imalo bi se svašta reći, ali to nije sada bitno. Ovdje je u biti cilj ove inicijative da imamo Općinsku izbornu komisiju kojima će vrijeme trajanja mandata svima biti isti.

ALMA OMEROVIĆ -. predsjedavajuća

Provjerit ćemo šta je najispravnije i tako ćemo postupiti.

ALEMA DŽAFO - vijećnica NIP-a

Zašto na dnevnom redu nema Informacije o stanju iz oblasti socijalne zaštite JU Kantonalni centar za socijalni rad Sarajevo – Služba Ilijaš?

ALMA OMEROVIĆ -. predsjedavajuća

Nisu dostavili Informaciju u predviđenom terminu, te ćemo tražiti da dostave za narednu sjednicu OV-a Ilijaš.

AKIF FAZLIĆ - općinski načelnik

Kao predlagač, povlačim tačku 5. i 6. predloženog dnevnog reda. Podržavam inicijativu kada je u pitanju stavljanje tačke na dnevni red donošenje Odluke o raspisivanju javnog oglasa za jednog člana Općinske izborne komisije.

Pitanje za Informaciju Centra za socijalni rad ćemo provjeriti i vjerovatno će Informacija biti na sjednici u junu. Također, želim kazati da ćemo na junskoj sjednici imati prijedlog Odluke vezano za referendum, jer bilo je nekih stvari, možda i "šumova" u nekim komunikacijama službe, kolegija i sviju nas, ali kada je u pitanju Služba, ona će pripremiti prijedlog Odluke za junsku sjednicu.

ALMA OMEROVIĆ -. predsjedavajuća

Tačke predloženog dnevnog reda 1,2,3 i 4 ostaju na istom broju, a tačka 5. i 6. se povlače, tačka 7. postaje tačka 5., tačka 8. postaje tačka 6., tačka 9. postaje tačka 7., tačka 8. je Prijedlog Odluke o raspisivanju Javnog oglasa za imenovanje 1 (jednog) člana Općinske izborne komisije Ilijaš i tačka 9. je Informacija Sedme policijske uprave - Policijske stanice Ilijaš.

Kolega Šerak, vodila sam se vašim sugestijama tj. ako su predstavnici iz Ilijaša i imaju na dnevnom redu Informaciju, da ona bude na kraju dnevnog reda, ali vi imate različito mišljenje od sjednice do sjednice, ali meni nije problem da Informacija Sedme PU-PS Ilijaš bude na početku dnevnog reda. Znači, po prijedlogu vijećnika Alana Šeraka, ovu Informaciju možemo staviti poslije Informacije iz oblasti iz šumarstva ili želite prije.

ALAN ŠERAK - vijećnik SDP-a

U svom uvodnom izlaganju sam rekao da oni trebaju da budu zadnji i ja se toga držim.

ALMA OMEROVIĆ -. predsjedavajuća

Uvažili smo vašu sugestiju da neko ko dolazi sa općine, a ima Informaciju, da ona bude na zadnjem mjestu u dnevnom redu.

ALAN ŠERAK - vijećnik SDP-a

Dakle, rekli smo da Informacije idu kao zadnje u dnevnom redu. Zašto onda nisu sve Informacije zadnje? Sada ide kontra pitanje. Sada se vi kao pozivate na ono što sam nekada rekao da ja mijenjam stavove od sjednice do sjednice. To je apsolutna laž. U uvodu sam rekao da Informacije trebaju uvijek da budu zadnje i takva je praksa bila od

kada ovo Vijeće postoji i onda sam dao prijedlog da se ova tačka pomjeri na 5. mjesto zato što Informacije imamo na 3. i 4. mjestu, a ako hoćete da se držimo mojih stavova, onda bi sve Informacije trebalo da idu kao zadnje tačke dnevnog reda. Želio sam samo da budem pragmatičan i praktičan da zadnju tačku pomjerimo na 5. mjesto i da onda raspravljamo o određenim stvarima, ali odustajem od zahtjeva neka ostane ova tačka zadnja. Za ubuduće ću vas zamoliti da praktikujete da su Informacije uvijek zadnje tačke dnevnog reda.

ALMA OMEROVIĆ - predsjedavajuća

To da vi govorite da je nešto što govorim apsolutno laž, to je vama na obraz, a ja sam se zaista potrudila da ispoštujem neke vaše prijedloge i preporuke. Bilo je prethodno priče da gosti ne čekaju, pa je bilo da vratimo Informacije, tako da zaista mi nije bila namjera da imamo lošu komunikaciju, nego da udovoljim svima.

HALID DIZDAREVIĆ - vijećnik SDA

Po pitanju dnevnog reda i Informacija općenito, apsolutno se slažem sa diskusijama i predsjedavajuće i kolege Šeraka, a razlog su redni brojevi Informacija U prethodnom mandatu smo imali Informacija gdje ljudi iz Sarajeva dođu na sjednicu odsustvuju sa posla, i čekaju dugo vremena da nam prezentuju Informaciju koju mi primamo k znanju. Koja po redu će biti Informacija je formalno pitanje i apsolutno je upravu kolega da nekada Informacija treba da bude 2., a nekada zadnja itd. Smatram da Kolegij OV-a treba naći neki vid konsenzusa da ovo završimo već jednom i da se dogovorimo hoće li to biti na početku ili na kraju dnevnog reda da jednostavno ne dolazimo u situaciju da mi vršimo procjenu da li neko treba biti drugi ili zadnji, a nije bitno o kome se radi. Podržavam svaki vid dogovora.

ALMIR ŠPIODIĆ - vijećnik NIP-a

Povlačenje tačaka sa dnevnog reda od strane načelnika mislim da je nekorektno prema vijećnicima, jer dostavite nam obimne materijale i mi se pripremimo, a onda nam vi to na sjednici povučete. Po Programu rada OV-a mi smo već prošli mjesec trebali raspravljati o ovim tačkama dnevnog reda, što znači da već kasnimo.

ADNAN ABADŽIJA - vijećnik NIP-a

Kraj je mjeseca, a povlači se sa dnevnog reda Prijedlog Odluke o davanju saglasnosti na Plan rada Javne ustanove "Kulturno-sportski centar i Radio Iljaš" za 2021. godinu, pa bi taj Plan trebalo usvojiti na početku godine da bi ova ustanova imala Plan po kojem treba da radi, a mi tek na pola godine treba da usvajamo ovaj Plan rada KSC-a. Mislim da je ovo neozbiljno i od strane menadžmenta firme i predlažem da u se u narednom periodu Planovi svih ustanova donose na usvajanje u januaru ili februaru tj. u I kvartalu.

Ono što je vijećnik Handžić rekao, Informacija VII PU-PS Iljaš - ovo smo mi dobili po usmenom izlaganju komandira PS i ovo su samo odgovori na vijećnička pitanja. Ako je to to i danas da raspravljamo o ovim izrazima i pitanjima koje smo mi koristili, ja predlažem da se ova Informacija povuče sa dnevnog reda ili neka je abdejtaju i dostave nam Informaciju kako treba.

ALMA OMEROVIĆ - predsjedavajuća

Ispred VII PU-PS Ilijaš će neko doći na sjednicu i izvijestiti nas po pitanju ove tačke dnevnog reda i možda oni smatraju da je to Informacija, ali mi ćemo ponovo kazati šta imamo na toj tački dnevnog reda.

Primjedbi i prijedloga na predloženi dnevni red više nije bilo, pa je OV-e većinom glasova usvojilo sljedeći

#### DNEVNI RED

1. Vijećnička pitanja i inicijative
2. Izvještaj o realizaciji zaključaka sa 5. sjednice Općinskog vijeća Ilijaš
3. Informacija o izvršenju Budžeta Općine Ilijaš za period 01.01.-31.12.2021. godine
4. Informacija iz oblasti šumarstva
5. Prijedlog Odluke o novčanim podrškama u poljoprivrednoj proizvodnji na području Općine Ilijaš za 2021. godinu
6. Prijedlog Odluke o davanju saglasnosti za raskid ugovora, broj: OPU-IP br.478/17, k.č. br.360/13 K.O. Ilijaš Grad i posjedovni list broj:197, K.O. Ilijaš Grad
7. Prijedlog Odluke o razrješenju člana Općinske izborne komisije Ilijaš Senade Hadžimehmedagić
8. Prijedlog Odluke o raspisivanju Javnog oglasa za imenovanje 1 (jednog) člana Općinske izborne komisije Ilijaš
9. Informacija Sedme policijske uprave - Policijska stanica Ilijaš

#### AD-1

Vijećnička pitanja i inicijative

MEHMED SINANOVIĆ - vijećnik SDA

Pitanje:

1. Upućujem pitanje rukovodstvu i nadležnim službama KJKP "Rad" d.o.o. koji, su razlozi neadekvatnog održavanja čistoće, preciznije blagovremenog odvoženja otpada na području općine Ilijaš?

Obrazloženje: Tokom, i neposredno nakon muslimanskog praznika, Ramazanskog bajrama, ne mali broj pritužbi građana općine Ilijaš pristigao je predstavnicima lokalnih organa vlasti i predsjednicima Savjeta mjesnih zajednica, zbog ni malo prikladnog, nezapamćenog nečistog ambijenta.

SEID BEKTIĆ - vijećnik SDA

Pitanje:

1. Zašto već tri mjeseca nije riješeno pitanje o načinu izdavanja prostorija u Domu MZ Malešići iako u Odluci OV-a Ilijaš iz 2018. godine stoji da za takve i slične slučajeve treba da se formira općinska komisija?

Inicijativa:

Pokrećem inicijativu da se asfaltira dio puta u iznosu od 120 m u naselju Donja Karaula, te da se izvrši postavljanje rasvjetnih tijela na dionici puta Malešićki most - Donja Karaula.

AMINA RAMIĆ - vijećnica NIP-a

Pitanja:

1. Po kojem Ugovoru se vrši izvođenje radova na putu u selu Moševići?

Od mještana sela Moševići postavljeno je pitanje po kojem Ugovoru se vrši izvođenje radova na putu prema starom selu Moševići. Naime, u proteklim godinama, u više navrata, obraćali su se općini Ilijaš sa zahtjevom za pomoć u vidu kanalisa za odvodnju oborinskih voda. U kišnom periodu sve oborinske vode sa Poloma teku ionako lošim makadamskim putem, a koji svi mještani koriste, jer se imanja uglavnom nalaze u gornjem dijelu sela. Održan je i zbor građana na kojem su doneseni zaključci da se prioritarno riješi odvodnja. Zanima ih da li je pomenuti Zapisnik uopće dostavljen nadležnima na postupanje? A ako jeste, kako se moglo desiti da se radovi izvode protivno željama mještana, a kako se navodi, na volju pojedinaca.

2. Molim da mi se dostavi kopija dokumentacije - projektnog zadatka po kojem su izvršeni radovi na probijanju nove trase puta u selu Moševići.

Prethodno tražim na zahtjev dijela mještana sela Moševići.

Ukoliko za izvedene radove na probijanju nove trase puta postoji projektna dokumentacija, tražim da mi se ista dostavi i to posebno dio koji se odnosi na elaborat uticaja na okoliš. Posebno ako znamo da je općina Ilijaš u ranijim godinama izvršila sanaciju klizišta u selu Moševići i uložila ne mala sredstva, a sada vrši radove koji direktno ugrožavaju već sanirano klizište i otvara mogućnost za nastajanje novog. Za one koji nisu upućeni, napominjem da se radi o vrlo poznatom i vrlo strmom terenu gdje svaki veći građevinski zahtjev, zahtijeva izradu elaborata uticaja na okoliš. Također, napominjem da se u podnožju pomenutog područja nalaze i imanja mještana koji su bili jedni od prvih povratnika na gornjem dijelu općine Ilijaš.

3. Molim nadležnu općinsku službu da mi dostavi kopiju Rješenja o rušenju nelegalno izgrađenih objekata na području općine Ilijaš u periodu 2019/20.

Koliko ukupno rješenja takve vrste postoji, te da li su izvršena rušenja pomenutih objekata?

Inicijativa:

1. Tražim da nadležna općinska Služba civilne zaštite izvrši uviđaj na terenu u selu Moševići, a u dijelu u kojem je vršeno izvođenje radova na probijanju nove trase puta i da svoj nalaz i mišljenje prezentira na slijedećoj sjednici OV-a.

ALEMA DŽAFO - vijećnica NIP-a

Izražavam nezadovoljstvo zbog toga što nisam dobila odgovore na postavljene inicijative na prethodnoj sjednici. Ukoliko odgovore ne dobijem na slijedećoj sjednici, ponovo ću iste pokrenuti.

Inicijative:

1. Pokrećem inicijativu za čišćenje i uređenje prostora oko brane na rijeci Misoči, te postavljanje klupa i stolova kako bi dobili lijepo izletišta za građane Ilijaša, ali i ostale.

Obrazloženje: Općina Ilijaš zaista obiluje prirodnim bogatstvima, a među njima je i područje oko korita rijeke Misoče. Jedno takvo mjesto je i brana na rijeci Misoči gdje se okuplja veliki broj građana. Trenutno je ovo mjesto zaraslo i praktički pretvoreno u deponiju, te kao takvo nije pogodno i privlačno za okupljanje ljudi i uživanje u prirodnim ljepotama. Ovim putem pokrećem inicijativu za čišćenjem i uređenjem ovog prostora koji bi mogao uz mala zalaganja postati jednim od najposjećenijih mjesta u Ilijašu, izletišta za sve građane, koji prirodne ljepote ne bi morali tražiti izvan granica općine, jer ih općina Ilijaš itekako ima.

2. Pokrećem inicijativu za asfaltiranje makadamskog puta na dionici Lješev-Odžak u dužini od 250 m, s obzirom da na ovoj relaciji trenutno se nalazi 7 (sedam) novoizgrađenih kuća, te im makadamski put otežava prilaz.

HALID DIZDAREVIĆ - vijećnik SDA

Pitanje:

1. Prema kojim kriterijima i zbog kojih razloga se nadležna općinska komisija odlučila za djelimičnu raspodjelu finansijskih sredstava iz fonda za mlade, gdje je od ukupno 10.000,00 KM, dodijeljeno 8.000,00 KM, a pri tom je Vijeću učenika SŠC "Nedžad Ibrišimović", za dva projekta umanjen budžet za 1023,00 KM?

ALMIR ŠPIODIĆ - vijećnik NIP-a

Imam pitanje za predsjednika Komisije za izbor i imenovanja, ali obzirom da trenutno nije prisutan, sačekat ću da se vrati u salu Vijeća, jer želim da mi se odmah odgovori.

ANELA SUBAŠIĆ - vijećnica SDP-a

Pitanje:

1. Zašto je ukinuta policijska patrola za gornji kraj naše općine?

Inicijative:

1. Upućujem inicijativu za uređenje Društvenog doma Kamenica i obezbjeđenje materijalnih sredstava za održavanje higijene u istom.

Obrazloženje: S obzirom da se postojeći Društveni dom u Kamenici nalazi u jako lošem stanju, pokrećem inicijativu za uređenje istog. Pomenuti prostor ne samo da nije funkcionalan, nego je nesiguran i nehigijenski prostor za djecu i odrasle. Zbog katastrofalnog stanja u kojem se nalazi, u najkraćem roku potrebno je učiniti funkcionalnim unutrašnja dva toaleta, okrečiti/ofarbat zidove, izmjeniti stolariju ili postojeću ofarbat i zamjeniti brave, te omogućiti kotlovnici za zagrijavanje prostora zimi. Kako bi se prostor u domu održavao, posebno zbog djece koja dolaze tu obavljajući treninge i rekreativne aktivnosti, potrebno je i obezbjeđiti sredstva za održavanje higijene.

Prilog: slike

2. Upućujem inicijativu za postavljanje stubova javne rasvjete u naselju Gornja Luka na dionici puta Gornja Luka - Ribarići.

Obrazloženje: U ime stanovnika Gornja Luka iniciram postavljanje stubova rasvjete na



dionici 500 m javnog puta. Naime, rasvjeta postoji do podvožnjaka od auto-puta i nastavlja do naselja Ribarići, ali put koji vodi od podvožnjaka prema domaćinstvima u Gornjoj Luci do porodične kuće Šećića ne posjeduju uličnu rasvjetu. Realizacijom ove inicijative olakšali bi smo život građanima koji tu žive, ali i doprinijeli očuvanju sigurnosti svih stanovnika.

MEHO HIDO - vijećnik NIP-a

Na molbu stanovnika Velikih Šuma - porodica Spahić i Korjenić prenosim riječi zahvale nadležnim općinskim službama, načelniku općine i svima onima koji su učestvovali u realizaciji njihovog projekta.

Također, pozitivne reakcije prenosim sa lokaliteta Rakova Noge i smatram da će se ove aktivnosti nastaviti i u budućem periodu.

HALID DIZDAREVIĆ - vijećnik SDA

Inicijativa:

1. Pokrećem inicijativu prema JU Dom zdravlja KS da se riješi status pulmologa u OJ Dom zdravlja Ilijaš.

Obrazloženje: Naime, u posljednje dvije godine, odkada je dotadašnji pulmolog, dr.Dejan Dragišić preraspoređen na radno mjesto u drugoj OJ, građani općine Ilijaš usluge pulmologa ostvaruju u drugim OJ. Ovakav odnos rukovodstva JU DZ KS građane Ilijaša dovode u nepovoljan položaj, u odnosu na građane drugih općina, jer za ostvarivanje usluge pulmologa moraju da putuju i do 50 km. Prema standardima i normativima u zdravstvu ("Sl.novine Federacije BiH", broj 58/18) jedan pulmolog se raspoređuje na 65 hiljada stanovnika, te prema tome, općini Ilijaš pripada jedan pulmolog minimalno dva dana u sedmici. Treba napomenuti da pojedine općine, sa istim ili manjim brojem stanovnika, imaju pulmologa pet dana u sedmici.

ANEL BUMBULOVIĆ - vijećnik SDA

Pitanja:

Pitanje za JKP "Vodostan" d.o.o. Ilijaš

1. Da li se redovno i uredno vrši ponovna verifikacija pojedinačnih vodomjera koje su propisane po Zakonu o mjeriteljstvu BiH?

Obrazloženje: S obzirom da se u vašim odgovorima na vijećnička pitanja i inicijative često pozivate na Zakon o mjeriteljstvu BiH, Uredbu o opštim uslovima za snadbijevanje vode za piće, obradu i odvođenje otpadnih i oborinskih voda, interesuje me da li se pridržavate navedenih Zakona koji zahtijevaju ponovnu verifikaciju vodomjera za hladnu vodu svakih pet godina i toplu vodu svake tri godine? Ovo je propisano članom 15. Zakona o mjeriteljstvu BiH:

- stav (1) - narednoj verifikaciji podliježu mjerila koja se nalaze u upotrebi ili ona koja se čuvaju radi stavljanja u promet
- stav (2) - naredna verifikacija obavezno se vrši prije isteka roka prethodne verifikacije.

Interesuje me da li se mjerila kojima je istekla prethodna verifikacija smatraju ispravnim?

2. U kojoj fazi realizacije se nalazi inicijativa za sanaciju stubova javne rasvjete u ul.Žrtava genocida u Srebrenici?

Obrazloženje: U prethodnom periodu, u dva navrata sam pokretao gore navedenu inicijativu za sanaciju gore navedenih stubova, ali do realizacije istih nije došlo, te isti stoje u neadekvatnom položaju i postoji opravdana prijetnja da isti padnu na saobraćajnicu i pješačku stazu. Ono što se može primjetiti jeste da se na navedenim stubovima nalazi više različitih instalacija (4-5) koje prekomjerno opterećuju iste.

U sklopu odgovora na ovo pitanje, želio bih da mi se dostave kopije odgovarajućih dozvola za postavljanje instalacija na pomenutim stubovima kao i mišljenje da li navedeni stubovi mogu podnijeti opterećenje već postavljenih instalacija?

3. Šta je poduzeto povodom moje inicijative sa martovske sjednice OV-a, a koja se odnosi na saniranje divljih deponija i poduzimanje mjera kako bi se spriječilo ne adekvatno odlaganje otpada ispod auto-puta u naseljima Kadarići i Podlugovi?

VERNESA BEŠLIJA - vijećnica NIP-a

Inicijativa:

1. Podnosim inicijativu za postavljanje tabli na koševima na košarkaškom igralištu u MZ Misoča.

Table na navedenom igralištu su devastirane (jedna je u jako lošem stanju, a druge uopće nema), te ih je potrebno zamijeniti kako bi igralište vratili u upotrebljivo stanje.

Pitanje:

1. U Izvještaju o radu Pravobranilaštva KS u zastupanju Općine Ilijaš za 2020. godinu naveli ste da su bila dva predmeta koja se odnose na otkup stanova - stambeni ugovori. Molim vas da mi dostavite s kim su zaključeni navedeni Ugovori?

ADNAN ABADŽIJA - vijećnik NIP-a

Pitanja:

1. Koji planirani i inicirani projekti u oblasti građevinarstva su realizovani i u kojem procentu u dosadašnjem dijelu 2021. godine na osnovu Operativnog plana načelnika za 2021. godinu?

2. Koji su građevinski projekti, trenutno u fazi implementacije i trebaju biti realizovani do kraja II kvartala 2021. godine na osnovu Operativnog plana načelnika za 2021. godinu?

Inicijativa:

1. Pokrećem inicijativu za hitnu sanaciju oštećenih dijelova na kolovozu, dionica puta Gajevi-Dragoradi na par na krivina gdje autobusi otežano saobraćaju, a prevoze učenike od Dragorada do Srednjeg i obrnuto.

Također da se izvrši nasipanje bankina iste dionice da ne bi dolazilo daljnjeg oštećenja asfalta (lomljenja krajeva kolovoza).

Obrazloženje: Dionica kolovoza je atmosferskim uticajima oštećenjem mehanizacije i motornim prevozom sredstvima doveden u loše stanje, te kako ne bi došlo do daljnjeg oštećenja asfalta i isti bi bio dugovječniji, potrebno je izvršiti sanaciju.

Ujedno bi se proširila kolovozna traka i krivine, te olakšalo mimoilaženje vozila na istoj dionici koji su svakako nepregledni na većini dionica.

## AKIF BEŠLIJA - vijećnik SBB-a

### Inicijativa:

1. Pokrećem inicijativu prema nadležnoj općinskoj službi da mi se dostavi informacija od JU Službe za zapošljavanje Kantona Sarajevo - Biro Ilijaš, da li nezaposlene osobe koje se prijavljuju na evidenciju nezaposlenih osoba Službe za zapošljavanje Kantona Sarajevo, mogu da se vode kao nezaposlene osobe od dana dolaska/prijavljivanja na biro ili od narednog dana od dana prestanka Ugovora o radu, a ne od dana zakazivanja termina za određivanje datuma za prijavljivanje na Biro?

Obrazloženje: JU Služba za zapošljavanje Kantona Sarajevo - Biro za zapošljavanje Ilijaš određuje termine kada osoba koja je nezaposlena može doći i prijaviti se na evidenciju kao nezaposlena osoba. Zbog ovakvog postupanja, mnoge osobe koje dođu na Biro da bi se prijavile kao nezaposlene osobe na evidenciju Biroa, a kojima sam Biro zakazuje termin za određivanje datuma za prijavljivanje na Biro (navedeni period između dolaska na Biro i zakazivanje termina je cca 10-15 dana), ostaju bez mnogih prava i privilegija koje imaju kao što su zdravstveno osiguranje, prijavljivanje na Javne pozive koji su često uslovljeni da osoba na određeni datum mora biti prijavljena na evidenciji nezaposlenih i sl. Po logici stvari, osoba kojoj je npr. 01.04. istekao Ugovor i kojoj je poslodavac uručio Rješenje o prestanku Ugovora o radu sa danom 01.04., od dana 02.04. se vodi kao nezaposlena osoba. Nije uredu da se na evidenciji nezaposlenih takva osoba vodi npr od 10.04. kada joj je Biro zakazao termin za određivanje datuma za prijavljivanje na Biro, što je trenutna praksa JU Službe za zapošljavanje KS. Smatram da bi najpravednije i najrealnije bilo da osobe budu prijavljene na evidenciji nezaposlenih kao nezaposlene osobe od narednog dana od dana prestanka Ugovora o radu ili u krajnjem slučaju od dana dolaska/prijavljivanja na Biro, a ne od dana zakazivanja termina za određivanje datuma za prijavljivanje na Biro, iz razloga koji su naprijed navedeni.

## ALMIR ŠPIODIĆ - vijećnik NIP-a

### Pitanja:

1. Da li je pokrenut postupak izgradnje šehidskog spomenika u Medojevićima? Ako jeste, u kojoj fazi je izrade i kada se može očekivati početak radova?

2. Kada će početi rekonstrukcija školskog igrališta ispred područne škole Ljubnići i da li su pokrenute neke aktivnosti u vezi ovog projekta?

U posljednje vrijeme dobio sam dosta upita od građana MZ Ljubnići da li će radovi na izgradnji školskog igrališta početi ove godine.

Na drugoj sjednici Općinskog vijeća pokrenuo sam ovu inicijativu, a takođe istu inicijativu su pokretali i kolege iz prethodnog saziva Vijeća, ali još uvijek nije urađeno ništa po pitanju realizacije.

S obzirom da je ovaj projekat planiran Operativnim planom i Budžetom kao i prethodnih godina, te da je građevinska sezona krenula već gotovo dva mjeseca, molim vas da ubrzate realizaciju pomenutog projekta.

3. Pitanje za predsjednika Komisije i Komisiju za izbor i imenovanje:

Kako je moguće jednoglasno donijeti Zaključak ako se glasa sa 2 glasa ZA i 2 glasa UZDRŽANA, s tim da peti član koji je bio prisutan na sjednici kaže izuzimam se od svega i i piši da sam opravdano odsutan? Tražim pojašnjenje na koji se način može donijeti jednoglasno Zaključak ako se glasa sa 2 glasa ZA i 2 UZDRŽANA.

Očigledno da se unaprijed dogovorio taj scenarij, a u pitanju je moj zahtjev prema Komisiji za izbor i imenovanja, odnosno moj zahtjev nije bio upućen njima, nego je bio upućen Službi općinskog vijeća da mi se omogući zakonsko pravo definisano Statutom Općine Ilijaš i Poslovnikom o radu OV-a Ilijaš, tj. da mi se omogući penziono i zdravstveno osiguranje koje ne ostvarujem po nekom drugom osnovu. Međutim, Komisija za izbor i imenovanja, aktuelni predsjednik se rukovodio nekim svojim ličnim sujetama, umjesto da se rukovodio Poslovnikom o radu OV-a, članom 48, koji propisuje ingerencije i djelovanje Komisije za izbor i imenovanja. Međutim, on se oglušio na, zakonom propisane, akte i postupio je po nekom ličnom ili nekom drugom ubjeđenju. Htio sam pitati predsjednika Komisije, ne znam da li je sada prisutan u sali, da li ste svjesno ili iz političkog hira prekršili Statut Općine Ilijaš član 53. kojim se propisuje ostvarivanje prava vijećnika na socijano osiguranje (zdravstveno i penziono) ukoliko to pravo ne ostvaruje po drugom osnovu. Po ovom pitanju uputio sam žalbu na više adresa, a između ostalog, Ombudsmanu za ljudska prava BiH, tačnije Kantona Sarajevo, Ministarstvu pravde KS, Inspekciji za javnu upravu, općinskom načelniku i predsjedavajućoj OV-a Ilijaš. Jedino od predsjedavajuće OV-a Ilijaš o Ombudsmana za ljudska prava sam dobio odgovor, a od načelnika još nisam dobio odgovor ni mišljenje. Također, dobio sam dopis da je moja žalba otišla na postupanje Inspekciji za javnu upravu i očekujem da se i oni izjasne po ovom pitanju. Komisija za izbor i imenovanja kada je dobila moj zahtjev, razmatrala ga je na način da nema odgovora koji bi bio relevantan da napiše, već se bavila ličnim, sujetnim stvarima i rekla "odbija se zahtjev zato što pomenuti obavlja privatnu djelatnost i dužan je to prijaviti". Pitam Komisiju za izbor i imenovanja: "Da li vi gospodo znate da u Općini Ilijaš imate 5100 ljudi na Birou za zapošljavanje i svi ti ljudi nešto rade?" Svi mi koji smo na Birou moramo raditi da bi prehranili i izdržavali svoje porodice. Vi očigledno nemate taj osjećaj. Većina vas iz Komisije je dobro "uštimana" na državne poslove i nemate taj osjećaj kako je biti na Birou i zarađivati dnevnice pošteno popravljajući auta, praveći kuće itd. I vi to nazivate sistemskom korupcijom. Pazi ovo, kaže: "Da oni hoće da spriječe sistemsku korupciju postupajući po propisima koji ih propisiju". Mislim da je ova Komisija bruka za Općinu Ilijaš, a ja ću ići do kraja i uopšte mi više nije važno da li ćete mi odobriti moj zahtjev ili nećete. Ići ću da ispromovišem bruku i sramotu Komisije, njih kao ličnosti, političke ličnosti, a neki su čak predsjednici jedne od vodećih stranaka.

ALMA OMEROVIĆ - predsjedavajuća

Upozorila je vijećnika da je izašao iz okvira onoga o čemu treba da govori i sugerisala da vijećnik postavi pitanje i ili uputi inicijativu, jer to je tačka dnevnog reda. Vodite računa o vremenu, i ja sam se javila za vijećnička pitanja i inicijative, a još kolega čeka.

ALMIR ŠPIODIĆ - vijećnik NIP-a

Volio bih da mi predsjednik Komisije za izbor i imenovanja da odgovore.

DINO ČUSTOVIĆ - vijećnik NIP-a

Pitanje:

1. Da li je Alma Omerović - predsjedavajuća OV-a Ilijaš, u sukobu interesa obzirom da najvećim dijelom KSC u kojem je zaposlena, finansira osnivač preduzeća, Općina Ilijaš?

2. Informacija za načelnika i Službu za društvene djelatnosti

Obzirom da u javnosti smo mogli u prethodnim danima čitati i vidjeti kako je Ilijaš kao općina prvi put u historiji dobila prvaka BiH, tačnije osvajača Premier lige BiH, imam obavezu kao član takmičarske komisije STS BiH, sportista, trener i općinski vijećnik koji se zakleo pred Ustvom BiH da će govoriti i štititi istinu, obavještavam načelnika i općinsku službu da je osvajač Premier lige BiH za žene za sezonu 2020/21 STK "Aladža" Sarajevo što se može provjeriti na zvaničnoj stranici Stonoteniskog saveza BiH.

KENAN BUZA - vijećnik NIP-a

Inicijativa:

1. Pokrećem ponovo inicijativu da se postavi saobraćajno ogledalo na dionici puta od Šipadovih zgrada do Gradskog stadiona u Ilijašu. Lokalitet se može vidjeti na slici koju dostavljam u prilogu.

Prilog 1: Slika

2. Pokrećem inicijativu da se postavi saobraćajni usporivač-ležeći policajac na putu između A1 zgrade i džamije u Ilijašu.

Tom dionicom puta svakodnevno prolazi stotine dječaka i djevojčica koji pohađaju OŠ "Hašim Spahić".

Mislim da bi ležeći policajac u velikoj mjeri povećao sigurnost školaraca koji se kreću na ovom lokalitetu.

SELMA BARIĆ - vijećnica SDP-a

Inicijative:

1. Pokrećem inicijativu za sanaciju fekalne kanalizacije u Sovrlama

Pokrećem inicijativu za sanaciju fekalne kanalizacije na zadnjem dijelu sela Sovrle, idući putem iz Ilijaša. Tačnije ispod kuće Salošević Mirzeta i Nezire. U privatnom vlasništvu je došlo do istjecanja fekalnih voda, što je dovelo do neugodnog mirisa u većem dijelu sela, te prouzrokovalo loše stanje na privatnom vlasništvu, uništivši veći dio, jer se stvorio potok od tih fekalnih voda. Molim vas da se što prije nešto riješi po ovom pitanju.

Prilog 2- Fotografije u prilogu.



2. Pokrećem inicijativu za postavljanje punkta za plaćanje računa za komunalije.

#### OBRAZLOŽENJE:

Veliki broj građana smatra kako bi im postavljanje punkta olakšalo plaćanje računa, tj. izmirenje obaveza prema javnim komunalnim ustanovama/preduzećima.

3. Pokrećem inicijativu za sanaciju zgrade A1 (ulica 126. Ilijaške brigade broj 90)

Pokrećem inicijativu za sanaciju zgrade A1 i to posebno srednjeg dijela zgrade (koji se vidi na fotografijama u prilogu) gdje su vidljiva značajnija oštećenja zgrade, a u blizini je i dječiji park, te JU Vodostan, te je samim tim velika frekvencija građana i postoji opasnost obrušavanja iste što bi uveliko ugrozilo sigurnost svih stanovnika/prolaznika.

ALAN ŠERAK - vijećnik SDP-a

#### Inicijativa:

1. Podnosim inicijativu da nadležni inspektor ponovo izađe na teren u naselju "Ulištovići" MZ Ljubina i u skladu sa svojim ovlaštenjima prinudno obustavi izgradnju vlastitog rezervoara korisnika Ivanić Gordane.

Obrazloženje: Dana 15.10.2020. godine izvršen je inspekcijski nadzor od strane urbanističko-građevinskog inspektora Općine Ilijaš koji je tom prilikom naložio obustavljanje radova na izgradnji vlastitog rezervoara koji nije u skladu sa Uredbom o opštim uslovima za snadbijevanje vodom za piće, obradu i odvođenje otpadnih i atmosferskih voda Kantona Sarajevo ("Sl. novine Kantona Sarajevo", broj 22/16) obzirom da se korisnik oglašio o nalogu nadležnog inspektora, podnosim inicijativu da isti ponovo izađe na teren i uvaži navedenu inicijativu.

#### Prilog 3:

- obavještenje komunalnog inspektora;
- molba predsjednika Savjeta MZ Ljubina od 19.04.2021. godine;
- molba predsjednika Savjeta MZ Ljubina od 10.09.2020. godine.

DENIS DILBEROVIĆ - vijećnik SDA

#### Inicijative:

1. Pokrećem inicijativu prema KJP "Sarajevo-šume" da se izvrši prokres puta na relaciji Čevljanovići-Gajevi, Gajevi-Dragoradi, Gajevi-Vrutci, Raskršće-Udrabi-Gajine-skretanje za Kruševo i dio puta kroz Sudiće.

Molim vas da na navedenim dionicama izvršite prokres i sječu niskog rastinja zbog preglednosti puteva i sigurnosti saobraćaja na navedenim pravcima.

2. Pokrećem inicijativu za postavljanje saobraćajne signalizacije na području Mjesne zajednice Gajevi i Dragoradi.

3. Pokrećem inicijativu da se izvrši sanacija makadamskog puta Vrutci-Rakova Noga-Sirovine.

4. Pokrećem inicijativu da se uradi rasvjeta u MZ-e Gajevi, naseljeno mjesto Vukasovići,

tačnije Raštevica, cca pet sijaličnih tijela.

5. Pokrećem inicijativu da se obezbijede sredstva za postavljanje cijevi sa rezervoara Gudelj do naselja Donji Vrutci.

ADEM ALIĆ - vijećnik SDA

Inicijativa:

1. Razmatrajući prijedloge za uređenje i unaprijeđenje izgleda naše općine, grupa građana je došla na ideju za postavljanje jarbola sa zastavom BiH u ulici Alića rapma do broja 36, odnosno na lokaciji preko puta benzinske pumpe "Hasanal".

Obrazloženje: U svrhu stalnog unaprijeđenja izgleda naše općine, a po ugledu na ostale općine u Federaciji BiH, grupa građana je došla na ideju za postavljanje jarbola sa zastavom BiH u ulici Alića rapma do broja 36, odnosno na lokaciji preko puta benzinske pume "Hasanal". Planirani jarbol bi bio visok 70 m, dok bi zastava bila dimenzija 30x20 m. Smatramo da je pomenuta lokacija izuzetno pogodna za postavljanje jarbola sa zastavom BiH, obzirom da bi sa te pozicije bila vidljiva sa sve četiri strane, kao i sa autoputa koji je u neposrednoj blizini. Značaj postavljanja jarbola sa zastavom bi bio višestruk, prvenstveno zbog razvijanja stepena patriotizma i ljubavi prema domovini na kojima je neophodno raditi svakoga dana, pogotovo kada su u pitanju mlađe generacije. Pored toga, smatramo da bi isto doprinijelo samoj estetici prostora na kojem je isti planiran obzirom da se radi o neiskorištenoj površini koja bi nakon instalacije bila uređenija i redovno održavana. Molimo vas da u naše ime i u ime svih građana Općine Ilijaš razmotrite našu inicijativu, te da istu zajedno isplaniramo, ako ne za ovu, onda za slijedeću budžetsku godinu ili u slučaju rebalansa Budžeta ove godine.

ALEN ARNAUTOVIĆ - vijećnik SDA

Inicijativa:

1. Pokrećem inicijativu prema nadležnim općinskim službama za postavljanje znakova i putokaza u neposrednoj blizini OJ Dom zdravlja Ilijaš i punkta Hitna pomoći u užoj gradskoj jezgri.

Obrazloženje: U užoj gradskoj jezgri, u neposrednoj blizini OJ Dom zdravlja Ilijaš i punkta Hitne pomoći KS, ne postoji niti jedan znak koji bi usmjeravao građane na lokacije Doma zdravlja i Hitne pomoći. Mislim da je ovo od velike važnosti, jer građani vrlo često ne znaju lokaciju punkta Hitne pomoći zbog neadekvatnog obilježja.

KENAN HASIĆ - vijećnik SDA

Pitanja:

1. U kojoj fazi se nalaze radovi na izgradnji nove podstanice za vodu u naselju Kadarići? Pitanje postavljam jer naselje Gornji Kadarići ostaju bez redovnog vodosnadbijevanja jer podstanica nije u funkciji.

2. Kada je planiran nastavak radova na magistralnoj cesti Stari Ilijaš-Malešići? Radovi trenutno ne traju tj. gradilište je prazno, a lokalno stanovništvo zbog velike količine prašine nije u mogućnosti da funkcioniše normalno. Smatram da su uslovi za rad ispunjeni, te da radovi mogu početi već danas.

Inicijative:

1. Pokrećem inicijativu za uklanjanje truhlog drveća (stabala) u centru Ilijaša (MZ Ilijaš Grad) u ulicama:
  - Hašima Spahića (preko puta GRAS-ove stanice);
  - u parku preko puta BINGA (zgrada kod stana gospodina Aziza Fazlića).

Obrazloženje: Truhlo drveće ugrožava sigurnost građana, te postoji šansa o stvaranju materijalne štete ukoliko se drvo obruši.

2. Pokrećem inicijativu za uređenje Cvijeta Srebrenice i to: uređenje (farbanje) spomenika, postavljanje kanti, uređenje i popravka mostova, nasipanje puta, osvjetljavanje prostora i spomenika.

SEMIR DEDIĆ - vijećnik SDA

Pitanje:

- 1 Tražim od nadležne općinske službe da mi se za iduću sjednicu OV-a Ilijaš dostavi Izvještaj o zaključenim Ugovorima o javnim nabavkama sa podacima:
  - vrsta postupka javne nabavke;
  - predmet ugovora;
  - trajanje ugovora;
  - procijenjena vrijednost;
  - naziv ponuđača sa kojim je zaključen ugovor;
  - ugovorena vrijednost bez PDV-a.

Također, da mi se dostavi i Izvještaj o trenutnoj finansijskoj realizaciji zaključenih Ugovora o javnim nabavkama za 2021. godinu.

ADNAN ABADŽIJA - vijećnik NIP-a

Pitanje:

Kroz pitanja kolege Hasića, a znam da je podnio inicijativu za postavljanje ograde uz obalu rijeke Rače do škole u Srednjem, a ja bih postavio pitanje:

1. Da li je ugovorom bilo predviđeno da se ta oграда planira (postavi) u projektu kada je rađan podzid do rijeke Rače? Možda je planirano, a nije urađeno jer se čekalo asfaltiranje. Znači da se provjeri, kao što je urađeno daljnjim tokom, nizvodno rijekom Račom. Djeca su krenula u školu i sa jedne strane je oграда postavljena, a sa druge strane nema ništa.

ALMA OMEROVIĆ - vijećnica SDA

Inicijative:

1. Iniciram prijedlog da se pokrenu aktivnosti planiranja i realizacije projekta instaliranja prikladnog osvjetljenja Centralnog spomen obilježja na području Mjesne zajednice Ilijaš Grad.
2. Iniciram prijedlog JU Fondu memorijala Kantona Sarajevo da pokrene aktivnosti



izgradnje prikladne kapije i ograde trenutno otvorenog dijela šehidskog mezarja u Starom Ilijašu.

MEHMED SINANOVIĆ - vijećnik SDA

Kolega Almir Špiodić neka pitanja dostavi pismeno i Komisija za izbor i imenovanja će zasjedati i odgovoriti pismeno, a ja ću se osvrnuti na konstataciju kolege da su članovi Komisije u poslovnom odnosu, a konkretno na sebe ću se osvrnuti. Kolega, ja sam magistar elektrotehnike, diplomirani inženjer elektrotehnike - smjer energetika i da ste vi to završili, ne bi bili na Zavodu za zapošljavanje, iako niti jednog takvog nema kod nas u evidenciji.

ALMIR ŠPIODIĆ - vijećnik NIP-a

Nisam zadovoljan odgovorom predsjednika Komisije za izbor i imenovanja. Kada govoriš o sistemskoj korupciji štimaš sebi petu sjednicu Komisije po mom slučaju da naplatite ukupno iz Budžeta Općine Ilijaš 1000,00 KM.

ALMA OMEROVIĆ - predsjedavajuća

Sugerisala je vijećniku da ne govori o tome ko kome nešto "štima", te da vrlo često snima takve stvari na mobitel kako bi nešto negdje objavio. Zamolila je da se to ne koristi ako smo korektni.

Kolega Sinanović i zatvaram raspravu po pitanju ove tačke dnevnog reda.

MEHMED SINANOVIĆ - vijećnik SDA

Kada je u pitanju ovo što kolega kaže da neko nekome nešto štima.

ALAN ŠERAK - vijećnik SDP-a (poslovnička intervencija)

Zaključili ste tačku dnevnog reda.

ALMA OMEROVIĆ - predsjedavajuća

Zamolila je kolege da ne dobacuju, kazala da nije zaključila tačku dnevnog reda, neosnovana je poslovnička intervencija i da kolega Sinanović nastavi.

MEHMED SINANOVIĆ - vijećnik SDA

Predsjedavajuća je rekla "Kolega Sinanović i zatvaram raspravu po pitanju ove tačke dnevnog reda".

ALAN ŠERAK - vijećnik SDP-a (poslovnička intervencija)

Na kraju ste rekli "ja ću zadnja".

ALMA OMEROVIĆ - predsjedavajuća

Kolega nemojte me učiti, nisam vam dala riječ i imam pravo da vodim sjednicu.

ALAN ŠERAK - vijećnik SDP-a (poslovnička intervencija)

Naravno da imate pravo da vodite sjednicu na način kako je propisao Poslovnik o radu OV-a Ilijaš.

ALMA OMEROVIĆ - predsjedavajuća

Nisam vam dala riječ i kolega Sinanoviću nastavite. Dakle, kolega Šerak dobili ste poslovničku intervenciju, rekla sam vam što sam imala i oduzimam vam riječ. Riječ ima kolega Sinanović.

Zatim je predsjedavajuća dala pauzu od 11:05-11:10h.

Nakon pauze, predsjedavajuća je izvijestila da je vijećnik Mehmed Sinanović odustao od diskusije i rasprave, a vijećniku Almiru Špiodiću će biti odgovoreno pismeno.

#### AD-2

Izvještaj o realizaciji zaključaka sa 5. sjednice Općinskog vijeća Ilijaš

Diskutanata po ovoj tački dnevnog reda nije bilo, pa je OV-e jednoglasno usvojilo

Izvještaj o realizaciji zaključaka sa 5. sjednice Općinskog vijeća Ilijaš

#### AD-3

Informacija o izvršenju Budžeta Općine Ilijaš za period 01.01.-31.12.2021. godine

AKIF FAZLIĆ - općinski načelnik

Načelnik je dao uvodno izlaganje, te između ostalog, kazao da Budžet Općine Ilijaš u I kvartalu bilježi 4.849.260,00 KM ostvarenih prihoda, što je 34% od planiranih prihoda u Budžetu za 2021. godinu. Sa druge strane, ostvareni su izdaci u iznosu od 1.835.330,00 KM što predstavlja 13% od planiranih izdataka u Budžetu i predstavlja suficit za navedeni period u iznosu od 3.013.930,00 KM. Obzirom da je Općina Ilijaš u proteklom periodu djelovala na osnovu Odluke o privremenom finansiranju i zbog toga na rashodovnoj strani smo imali nisko izvršenje budžeta. Nakon usvajanja Budžeta započete su sve procedure utroška sredstava, te onih procedura koje omogućavaju izvršavanje Budžeta. Očekujem da će Izvještj o izvršenju Budžeta za prvo polugodište biti mnogo povoljniji u smislu realizacije finansijskih sredstava.

ALEMA DŽAFO - vijećnica NIP-a

Zašto su veoma mala sredstva izdvojena u prvom kvartalu za socijalni program i novčane pomoći? U Budžetu imamo 33.000,00 KM namijenjeno za socijalni program, a do sada je izdvojeno 3.000,00 KM i zanima me kada će biti izdvojena ta sredstva? Također me interesuje subvencije za podsticaje razvoja obrta, poduzetništva, zašto do sada nisu izdvojena nikakva sredstva u prva tri mjeseca i kada je planirano?

ALMIR ŠPIODIĆ - vijećnik NIP-a

Vezano za utrošak sredstava kada je u pitanju rekonstrukcija puteva i mostova - da li načelnice znate da utrošena sredstva od 28.951,00 KM za put Borove su utrošena na način da je urađen potporni zid na dijelu puta koji, po meni, nije toliko kritičan, a da nije urađen na dijelu puta gdje su ugrožene kuće i imovina. Neću spominjati funkcionera koji graniči sa putem na ovoj parceli i kome je urađen potporni zid, a na osnovu zahtjeva MZ-e i građana nakon urađenog potpornog zida kada je na lice mjesta došao geometar, ispostavilo se da je potporni zid uvučen u put od granice sa pomenutim funkcionerom u Ilijašu. Znači, općina je uradila nekome potporni zid, a geometar nije izašao na teren da kaže dokle je potporni zid? Zanima me šta ćete uraditi po tom pitanju?

AKIF FAZLIĆ - općinski načelnik

Privremena Odluka o finansiranju ograničava realizaciju projekata i zbog toga imamo praktično vrlo malu realizaciju na socijalnim programima, a nismo uopšte imali realizaciju kada su u pitanju podsticajne mjere. Jedna od ključnih podsticajnih mjera je najveća stavka u Budžetu, a to je 100.000,00 KM za regresiranje kamatnih stopa za privrednike i u drugoj polovini godine će doći do realizacije ovih sredstava i doći će do realizacije u punom kapacitetu. Drugi najznačajniji podsticaj vezan je za poljoprivredu. Finansijska realizacija tog projekta kreće u trećem i četvrtom kvartalu. Na dnevnom redu je Prijedlog Odluke o novčanim podrškama u poljoprivrednoj proizvodnji na području Općine Ilijaš za 2021. godinu i na osnovu ove Odluke će se krenuti sa apliciranjem i finansijska realizacija ove vrste pozicija ide u drugoj polovini godine, a neke i na jesen (III i IV kvartal). Ova sredstva će se u punom kapacitetu realizovati.

Pitanje utroška sredstava za projekat Borovi - ranije je bilo pitanja koja su konkretizirana u smislu tehničke izvedbe i ostalog što se odnosilo na realizaciju tog puta, odnosno ovaj Ugovor je praktično vezan za 2020. i 2021. godinu i on se finansijski izrazio u ovom periodu kao neka faktura koja je sublimirala određene radove, a generalno ćemo dati potpuni izvještaj sa tehničke i finansijske naravi dok se projekat završi.

Diskutanata po ovoj tački dnevnog reda više nije bilo, pa je OV-e primilo k znanju

Informacija o izvršenju Budžeta Općine Ilijaš za period 01.01.-31.12.2021. godine

AD-4

Informacija iz oblasti šumarstva

DENIS KAHRIMAN - predstavnik Uprave za šumarstvo

Kada je u pitanju ova Informacija, mi smo blagovremeno odgovorili Općini Ilijaš, a u pitanju su: ulaganje u šumsku infrastrukturu, šumsko uzgojne radove, ulaganje u lokalnu infrastrukturu i problematika našeg rada. Iz Informacije se može vidjeti koliko je utrošeno namjenskih sredstava. Radi se o 25 projekata koji se sastoje od šumsko uzgojnih radova i projekti na rekonstrukciji, sanaciji i rehabilitaciji puteva. Sveukupno je utrošeno cca 854.000,00 KM u toku 2020. godine, a radi se o programu utroška sredstava iz 2019. godine iz razloga što su kasno sklopljeni Ugovori (krajem 2019. godine), tako da se nije bilo u mogućnosti u toku 2019. godine izvoditi radovi na terenu i rađeni su u toku 2020. godine. Operativni plan za 2020. godinu nije ni rađen zbog pandemije Korona virusa tako da je u opticaju sada program utroška namjenskih sredstava za 2020. godinu koji treba da

usvoji Vlada Kantona Sarajevo. Što se tiče problematike rada možete vidjeti iz materijala šta je radila Uprava za šumarstvo po pitanju regularnih zahtjeva za sječu privatnih šuma, po pitanju bespravnih sječa kako državnih tako i privatnih šuma, po pitanju broja podnešenih prijava i ako je nešto nejasno recite i objasniti ću.

**ALEN HASKOVIĆ - vijećnik SDA (predstavnik JKP Sarajevo-šume)**

U uvodnom izlaganju je rekao da JKP Sarajevo-šume gazduju šumom na cijelom području Kantona Sarajevo. U 2020. godini realizacija je bila manja od planiranog tj. realizovalo se 40,5 hiljada m<sup>3</sup>, a što je dijelom uzrokovano i pandemijom Korona virus. Ukupan broj uposlenika u preduzeću je 411 i to je prosječan broj uposlenika i on varira u toku godine i ovisi od sezonskih radova, a nekada doseže broj i do 450. Sa područja naše općine uposlano je 159 radnika. U 2020. godini Sarajevo-šume su vršile ljetno i zimsko održavanje puteva, traktorskih vlaka i za te radove iz vlastitih sredstava je utrošeno cca 77.000,00 KM. Provodile su se i aktivnosti iz sredstava OKFŠ-a za rekonstrukciju i održavasu se izvodili na putnim pravcima: Malinovica-Duševine, Ljubina-Vidotina, Tamni Do-Vučija homara, Sudići-Kongorje-Podlipnik, Vukinjača-Doline i Sokolina-Visojevice. U okviru tih sredstava, na području općine Ilijaš izvodili su se i šumsko-uzgojni radovi: pošumljavanje nanovo, popunjavanje gdje je prije bilo izvršeno pošumljavanje, a uspjeh sadnje bio manji, njega šuma, njega kultura je uzvršena na ukupnoj površini 226 ha. Rađeni su i projekti koji ranije nisu bili u praksi, a tiču se sanacije divljih deponija i doznaka sanitarnih užitaka što je redovna aktivnost svake godine. Sarajevo-šume imaju obavezu plaćanja naknade za korištenje šuma u visini od 6% od ostvarenog prihoda od drveta računajući cijenu drveta na panju i prihoda ostvarenog od drvnih šumskih proizvoda, najviše 10%. Naknade se uplaćuju u iznosima: 1% na depozitni račun KS i 5% na depozitni račun Budžeta općine Ilijaš. Između općine Ilijaš i JKP Sarajevo-šume na snazi je Sporazum o načinu izmirenja duga po osnovu naknade za korištenje državnih šuma za 2019. godinu i prvi kvartal 2020. godine u ukupnom iznosu od 189.904,96 KM u jednakim mjesečnim ratama od po 15.825,41 KM. Navedenim Sporazumom je definisan rok isplate posljednje rate 30. juna 2021. godine. Prema utvrđenoj dinamici otplate, izmirene su obaveze za mjesec juli, avgust, septembar i oktobar 2019. godine. Posljednja uplata je izvršena 30.04.2021. godine i odnosila se za mjesec oktobar 2019. godine. Po navedenom Sporazumu ukupno je uplaćeno 63.301,64 KM, a dugovoanaje po istom iznosi 122.603,32 KM. U 2021. godini planirane su aktivnosti iz godišnjeg plana poslovanja. Na području općine Ilijaš planira se posjeći 47.000,00 m<sup>3</sup> drveta. Cijenimo da općina Ilijaš i Sarajevo-šume trebaju nastaviti pozitivnu saradnju poštujući sve zakonske propise i rješavati eventualne probleme na obostrano zadovoljstvo. Jedan od problema su pozajmišta, odnosno kamenolomi i na tome svi zajedno trebamo raditi. Prilikom izrade Godišnjih planova, a na zahtjev Kantonalne uprave za šumarstvo, potrebno je da nam općina dostavi mišljenje u zakonskom roku kao što je to bilo i do sada. Sarajevo-šume su opredjeljene za održivo gospodarenje šumama i šumskim zemljištem i posjedujemo međunarodno priznati FSC certifikat. Nastojat ćemo, kroz zajedničke aktivnosti, da riješimo problem snadbijevanja lokalnog stanovništva ogrjevom.

**ALMIR ŠPIODIĆ - vijećnik NIP-a**

Imam nekoliko pitanja iz oblasti poslovanja preduzeća koje je djelimično vidljivo iz Informacije, a djelimično iz informacija koje kruže u javnosti. Pitanja ću postaviti gospodinu Haskoviću zato što je on bio na poziciji direktora u 2020. godini za koju se i veže ova Informacija.

1. Zašto Općini Ilijaš do aprila ove godine nije uplaćeno 158.254,00 KM na osnovu Sporazuma između Općine Ilijaš i JKP Sarajevo-šume po osnovu duga iz 2019. godine i I kvartal 2020. godine? Do sada je uplaćeno samo 63.301,64 KM.

2. Da li su tvrdnje iz javnosti tačne da je poslovanje preduzeća u 2020. godini bilo u gubitku od 2.500.000,00 KM? Ako jeste, iz kojeg razloga i kako možete pravdati da je došlo do gubitka od 2.500.000,00 KM? U isto vrijeme, na plate ste potrošili isto novca kao i godinu ranije kada je prihod bio 3.000.000,00 KM veći, a isto tako, na usluge sječe od strane drugih lica na sirovine.

3. U Informaciji navodite da ste vršili pošumljavanje 1,2 ha, ako sam dobro shvatio - da li ste sadnice uzgajali u vlastitim staklenicima koje ste platili, prema nezvaničnim informacijama, cca 100.000,00 KM bez prateće opreme, a isti na tržištu koštaju 30-40.000,00 KM zavisno od kvadrature.

4. Da li su tačne informacije koje kruže da ste stambeni kontejner platili cca 7.000,00 KM sa PDV-om, a procijenjena vrijednost je cca 1.500,00 KM.

MUHAMED HANDŽIĆ - vijećnik SBB-a

Žao mi je što na današnjoj sjednici nije prisutan ministar Privrede Kantona Sarajevo, generalni direktor Sarajevo-šuma i izvršni direktor kako je to nekada bilo tj. kompetentne goste koji će dati odgovore na sva naša pitanja. Imam nekoliko pitanja koja se tiču sviju nas.

1. Pitam odgovornu gospodu, u Zakonu o zaštiti šuma postoji li igdje i pod kojom tačkom, način zaštite prokopavanjem puteva? Uvjerio sam se na nekoliko lokaliteta da se šume štite prokopavajući javne puteve. Jedan od tih puteva vodi na spomen obilježje u Bioči. On je prokopan i mi bi trebalo da tražimo alternativni put. Nećemo. Ja sam juče zatrpao i sve ću vam zatrpati puteve na koje naiđem.

Drugo, na istom lokalitetu se nedavno desio požar koji vatrogasci nisu mogli ugasiti iz razloga nepristupačnosti.

2. Ovo pitanje se odnosi na objekat koji smeta gospodi sa Skenderije što prave ministarstva za općinu Centar, a ne za druge općine tj. hoće da nam ruše lovačku kuću i spomen sobu na Koritima. Ta kuća je postojala u ratu i služila je vojsci za odbranu ove zemlje. Ispred te kuće se nalaze zemunice gdje su se držala MTS i to su branili korićani i fašisti dalje nisu mogli proći. Isto tako, branit ćemo da ne srušite ovu kuću i nećete je srušiti vi koji imate aspiracije da srušite sve što je u Ilijašu napravljeno. Ima više objekata po šumama oko Ilijaša, ali ste nešto baš tu kuću izabrali da srušite i ja vas uvjeravam da to nije vikendica nikakvog tajkuna, niti je objekat za iznajmljivanje. Ovaj objekat baštini tradicije naše borbe i to ne smijete dirati, nećete dirati i ne damo vam dirati. "Ti Adnane Deliću, ministre privrede, si bio u pelenama dok smo mi branili ovu Zemlju i pravili tu kuću i njene temelje i nećeš to raditi".

3. Pitanje vezano za uposlenike. Kada je došlo do rotacija Vlada, govorilo se što ste ograničili ljudima radni odnos, pa rade na određeno, neodređeno itd. Iz Informacije vidimo da imamo 119 radnika na određeno, što znači da ih i ova Vlada nije primila za stalno. Nije ih ni prošla Vlada primila za stalno i tih ljudi je 106 sa Općine Ilijaš i oni su opet žrtve ove uposlenosti. O čemu onda ovdje pričamo, aplaudiramo ovdje i umanjena nam sredstva od

OKFŠ-a? Znači li šta to znači? Znači da ćemo mi iz općinskog Budžeta izdvajati sredstva za puteve do krajnjih dijelova općine (Podlipnik, Dragoradi itd.). Ako neko ima sumnje da sredstva od OKFŠ-a idu u druge svrhe, prijavite to nadležnoj inspekciji, a ne da podržavamo one s platoa Skenderije. Oni su popločali svoje prostore, a na našem gornjem kraju Ilijaša jedva se prođe džipom.

Znači, 106 ljudi je primljeno na određeno. Sada imamo, a imali smo i prije Ilijašane koji su na funkcijama u Sarajevo-šumama i izvolite i primite ove ljude da zasnuju stalni radni odnos.

DINO ČUSTOVIĆ - vijećnik NIP-a

Za Alena Haskovića imam dva pitanja.

1. U javnosti kruže glasine da je imovina u Zaostrogu prodana za prenisku cijenu. Molim da nam objasnite zašto je prodana za nižu cijenu od tržišne i zašto nije traženo mišljenje Pravobranilaštva KS i zašto nije tražena saglasnost Skupštine KS?

2. Pitanje Ugovora bivše uprave Sarajevo-šuma.

Obzirom da se ne spominju imena, interesuje me koja su to dva člana Uprave sami sebi zaključili Ugovore i da li to znači da će ista lica ostati bez posla i šta će biti sa njima? Kakve su zakonske mjere u procesuiranju tih lica?

ALMA OMEROVIĆ - predsjedavajuća

Sugerisala je da se vijećnici drže tačke dnevnog reda i da u tom smislu i postavljaju pitanja.

ADNAN ABADŽIJA - vijećnik NIP-a

Pitanja vezano konkretno za upravu Sarajevo-šuma.

1. Da li je istina i ako jeste, zašto su se, uz akumulirane obaveze 3.500.000,00 KM, i dalje uzimala i nenamjenski trošili sredstva OKFŠ-a i to na način da su uzeli 400.000,00 KM iz kantona, a da za taj novac nisu pokrenuli većinu projekata za koje ste preuzeli obaveze?

2. Da li su u vrijeme moratorija provedene aktivnosti zapošljavanja (ono što je kolega Handžić spomenuo), da li ste rješenja po istim procedurama potpisali vi gospodine koji ste do sada bili direktor i ako jeste, zašto je to urađeno, ako znamo da je to protivno Zaključku Skupštine Kantona Sarajevo?

3. Kada je u pitanju bespravna sječa, u Informaciji piše da je od januara do decembra 2020. godine bespravno isječeno cca 1800 m<sup>3</sup> drveta. Ja mislim da je to, po jednom kamionu koji može da natovari 10 m<sup>3</sup>, 180 kamiona ukradeno u toku godine dana. Znači, svaki drugi dan kamion drva nestane. Da li je ovo organizovana kriminalna skupina radila ili vi samo na osnovu onog što je posječeno, pronađeno, takoreći zabilježeno, evidentirate ovdje. Ne mogu da shvatim da i pored pripadnika MUP-a ovoliko drveta nestane.

VERNESA BEŠLIJA - vijećnica NIP-a

Pitanja za Alena Haskovića i Denisa Kahrimana.

1. Zašto se namjenska sredstva iz OKFŠ-a po vrlo upitnim projektima izgradnje šumskih kamionskih puteva koristila u višemilionskim iznosima za izgradnju tj. asfaltiranje postojećih puteva po selima, zanemarujući stvarnu namjenu tj. izgradnju novih šumskih kamionskih puteva koje otvaraju šume i samim time dovode do njenog unapređenja? Kako građani navode, u nekim selima vršeno je asfaltiranje do privatnih štala, te da li su to bile stvarne potrebe?
2. Zašto je nastao gubitak od cca 3.000.000,00 KM za vrijeme vaše Uprave kada je Uprava bivše Vlade šestorke ostavila gubitaka cca 57.000,00 KM?
3. Da li su plaćene naknade za korištenje šuma za 2019. i 2020. godinu i ako nisu, zašto nisu plaćene?

DENIS DILBEROVIĆ - vijećnik SDA

Slažem se sa diskusijom kolege Handžića.

Pitanje:

1. Zadnjih 4-5 godina smo dobijali sredstva od OKFŠ-a u iznosima cca 400.000,00 KM, a nekada je to iznosilo i milion KM. Na gornjem kraju smo izgradili mnogo puteva (sanirali i asfaltirali). Sada se spominje informacija, Ministarstvo privrede na čelu sa ministrom Delićem je ili poplovala ili ukinula ta sredstva, a do kraja godine vidjet ćemo šta će se desiti, ali ja tvrdim da je ukinulo. Na koji način oni misle popravljati te puteve koje oni najviše ruše. Gore svaki dan prođe 4-5 kamiona koji su pretovareni (voze po 40-50 m<sup>3</sup>), a i da voze koliko treba, opet je preteško za puteve kakvi su gore? Znači, na koji način će nadoknaditi općini Ilijaš milion KM koje su nam uzeli, a koje smo svake godine dobijali i planirali Budžetom?

SEID BEKTIĆ – vijećnik SDA

Pitanje:

1. Imajući u vidu da se mnoge firme u Ilijašu bave preradom drveta, da li vi vršite dovoljan zasad-obnovu drveta šumskog gazdinstva ili je to neki minimum koji imate u svom godišnjem planu i koji morate ispoštovati po Zakonu?

ALAN ŠERAK – vijećnik SDP-a

Zamolio je da se vijećnici drže tačke dnevnog reda i perioda za koji se Informacija veže.  
Pitanje:

1. Šta znači OKFŠ i sredstva koja su se izdvajala po tom osnovu da li su korištena u skladu s onim što bi trebalo da predstavlja ili su se na neki način zloupotrebljavala, posebno na području općine Ilijaš?
2. Koliko ste realizovali plan sječe u postotcima na području općine Ilijaš, a koliko u drugim općinama u Kantonu Sarajevo?

Pitanja:

1. Kako u narednom periodu mislite sanirati puteve koji su oštećeni prilikom eksploatacije šuma? Dostavljao sam fotografije put Solakovići-Povoča gdje je asfalt uzrovan i kako i na koji način mislite sanirati put ako ne budete dobili sredstva od OKFŠ-a?
2. Pridružujem se pitanju Handžić Muhameda i želim reći da Lovačko društvo takođe ima problema kada su u pitanju prokopavanja određenih puteva.

AKIF FAZLIĆ – općinski načelnik

Istakao je da se mora razlučiti ova problematika s aspekta šta je ova tačka dnevnog reda, šta su naše nadležnosti i šta su neka pitanja koja smo postavili za koja nemamo ingerencija niti jeste ovo tačka. Pitanje poslovanja Sarajevo-šuma je pitanje nadzornog odbora, pitanje Skupštine KS koja će dati ocjenu poslovanja i svega onoga što jeste to poslovanje. Također, to se odnosi i na Upravu, ali ovdje su Sarajevo-šuma i Uprava, naši partneri i nešto što se zove šumarstvo kao resurs na području općine Ilijaš i kako mi kao treći sudionik učestvujemo zajedno sa njima da bi to šumarstvo imalo najbolje benefite i kako bi se tim šumarstvom najbolje upravljalo i kako bi građani imali najveće koristi. Ova lokalna zajednica je uvijek podržavala i davali saglasnosti na šumsko gospodarske osnove i to tako treba i dalje ostati. Iz Informacije smo vidjeli i možda nismo ni bili svjesni koji je ovo resurs s apsektu finansijskih sredstava koja prođu kroz čitavo poslovanje Sarajevo-šuma, pa OKFŠ-a i svih popratnih aktivnosti. Dakle, jako bitan za našu općinu, s aspekta zapošljavanja vidjeli smo koliko ljudi radi u Upravi, s aspekta ulaganja u infrastrukturu iz sredstava koja donose ova šuma i šumsko zemljište. Ono što je bitno, jeste donošenje nove šumsko gospodarske osnove i tu moramo pristupiti sa dva asepktu. Jedan je zaštita vodozaštitnih zona i s aspekta režima saobraćaja, održavanje saobraćajnica, izgradnja saobraćajnica i rekonstrukcija saobraćajnica. Ove saobraćajnice koje koristite i vi su i lokalne saobraćajnice. Postavit ću pitanje, obzirom da smo u Operativnim planom predvidjeli da ćemo iz sredstava OKFŠ-a (dio sredstava gdje su općine aplicirale) realizirati tri projekta, da li je konačan stav da ove godine neće općine imati priliku aplicirati? Problematika koja je navedena jeste pitanje upisa vlasništva Sarajevo-šuma na šume i šumsko zemljište i to je, po meni, jedna incidentna situacija koja je samo u Kantonu Sarajevo i Srednjobosanskom kantonu. Općine su preko Saveza općina i gradova pokrenulo to pitanje da se riješi kako bi se svima olakšalo. Moja konstatacija, sa aspekta šumarstva, mi smo lokalna zajednica koja je imala benefite od ovog resursa i da se dobro sarađivalo i sa šumsko gospodarskim preduzećem i sa Upravom i to treba nastaviti i unaprijediti, puno toga imamo između, a zaista nam je zajednički interes.

ALEN HASKOVIĆ – vijećnik SDA (predstavnik Sarajevo-šuma)

Sarajevo-šume je preduzeće u vlasništvu Kantona Sarajevo. Vezano za poslovanje i neka pitanja koja ste postavili su u isključivoj nadležnosti rasprave Skupštine Kantona Sarajevo. Odgovorit ću na pitanja koja su u mom domenu. Kada je u pitanju dug prema općini, to je aktivnost koja se provodi više od deset godina i dug je akumuliran iz prethodnih godina. Sa općinom se pravi Sporazum i retroaktivno svoj dug otplaćujemo i konstantno ga smanjujemo. Opredjeljenost Uprave, i prethodne i ove je, da se taj dug u konačnici eliminiše. To je bilo pitanje vijećnika Almira Špiodića.

Kada je u pitanju gubitak 2.500.000,00 KM je pitanje za Skupštinu KS. Informacija je



tačna, a konstatacija da sam ja bio član Uprave, jesam, ali od kraja devetog mjeseca do kraja dvanaestog mjeseca, dakle ukupno tri mjeseca. Dug dijelom proističe iz poteškoće da se provedu sve procedure javnih nabavki koje su kasnile u prethodnoj godini i provedene su tek krajem prošle godine. Krajem prošle godine su uzete zalihe osnovnih sredstava za rad za naredna 3-4 mjeseca i to su sve obaveze koje su se prenijele u narednu godinu po sistemu odgode plaćana 30 ili 60 dana. Kolega Špiodiću, rekli ste da smo pošumili 1,2 h, i to je kolega 12 dunuma i ovdje dolazi do izražaja vaše neznanje ili vas nisam dobro razumio. Na području naše općine mi smo izvršili pošumljavanje i popunjavanje na 226 hektara i možda ste vi pogriješili. Ne znam tačan podatak koliko je to na području Kantona Sarajevo. Vaše sljedeće pitanje je bilo vezano za kontejner čija je procijenjena vrijednost cca 7.000,00 KM – on jeste nabavljen, a informaciju da je njegova tržišna vrijednost 1500,00 ili 2.000,00 KM, ja nemam i takve ponude nismo imali. Kolega Handžić je pitao za prokopavanje šumskih trasa – nije mi poznata ta aktivnost da se sprovodi od strane nas, a ako želite pisani odgovor to ćemo vam dostaviti. Što se tiče objekta i kuće na Koritima, razumio sam da ste od ministra dobili rješenje, a Sarajevo-šume ne stoje niti jednim dijelom iza toga da mi nešto želimo rušiti. Lično mislim da ga ne treba rušiti, ali to je rješenje koje ste dobili od ministra i to je van naše nadležnosti. Uposlenika je uvijek bilo na određeno i neodređeno vrijeme, kratko sam bio tu i politike koje su se vodile i da li je postojala mogućnost da se ljudi zaposle na neodređeno vrijeme, ja zaista ne znam. Za sredstva OKFŠ-a bilo je više pitanja od vijećnika, a i načelnik je pitao, pa ću vam svima dati jedan odgovor. OKFŠ – su sredstva opšte korisnih funkcija šuma koje svi privredni subjekti nakon završene poslovne godine od svog prometa odvajaju određeni procenat i uplaćuju ga Kantonu Sarajevo. Korisnici tih sredstava su Kantonalna uprava za šumarstvo, polovinu sredstava koriste za redovan rad, a drugu polovina sredstava smo korisnici mi, dijelom udruženja i dijelom općine. Mi realizujemo uzgojne radove, rekonstrukciju i sanaciju makadamskih puteva. Međutim, obzirom da su i općine korisnici tih sredstava i da mogu aplicirati za ta sredstva, odgovor na pitanje kolegice Vernese je da aktivnosti asfaltiranja i modernizacije puteva provodi se u nadležnosti općine. Ja razumijem da se ti putevi habaju i iznašao se način da se ti putevi asfaltiraju i moderniziraju i isto tako iznaći će se način da se ti putevi u neko vrijeme i poprave. Svi putevi se habaju, pa u neko vrijeme se ide u rekonstrukciju i obnovu. To je do sada bilo iz OKFŠ-a, a u narednom periodu će na drugi način i koliko sam razumio političke namjere ministra privrede je da će iz Budžeta Kantona Sarajevo izdvajati određena sredstva po ovom pitanju. Pitanje kolege Dine vezano za apartman u Zaostrugu – mogu odgovoriti koliko znam, a iz Press konferencije Sarajevo-šuma ste mogli čuti neke stvari. Po mojim saznanjima to se desilo 2016., 2017. godine i ta apartman u Zaostrugu je bio vlasništvo Šumarstva Vareš i Pilane Vareš. Diobom preduzeća, kada su došla u granice kantona, određeni procenat tog apartmana je pripao Sarajevo-šumama cca 40%. Prodaju je izvršilo Šumarstvo Vareš, odnosno Pilana Vareš, a Sarajevo-šume, koliko znam, nikada nisu do kraja bili upisani kao vlasnici tog apartmana. Oni s tu aktivnost proveli bez da su, Sarajevo-šume, Pravobranilaštvo i Skupština Kantona Sarajevo, znali bilo šta o tome. Nakon prodaje, tadašnji član nadzornog odbora je video tu vrstu aktivnosti i rekao da imamo određeni udio u tim apartmanima. Kontaktirani su Šumarstvo Vareš i Pilana Vareš i da ne bi došlo do tužbe dio tih sredstava je uplaćen na račun Sarajevo-šuma. Po kojoj cijeni je to prodato i kolika sredstva su uplaćena Sarajevo-šumama ja ne znam, a mislim da nije ni tema ni mjesto rasprave na Općinskom vijeću. Mi smo dostavili Informaciju za prošlu godinu, ali vi ste postavili malo šira pitanja, ali iz poštovanja i dobronamjerno prema vama, odgovorit ću što znam. Pitanje Ugovora za prethodne članove Uprave – radi se o meni i provest će se sve aktivnosti u skladu sa zakonskim propisima.

Pitanja zapošljavanja bez prethodnih saglasnosti – takva zapošljavanja mi nisu poznata i napominjem da sam vršio dužnost do kraja godine i do tada tih zapošljavanja bez saglasnosti nije bilo.

Pitanje da li je dovoljno pošumljavanje s obzirom na prerađivače kojima sirovina treba – mislim da jeste. Imamo šumsko gospodarsku osnovu po kojoj ima obavezu koja je planski predviđena da određene površine pošumimo i mi to radimo kroz proširenu biološku reprodukciju iz sredstava OKFŠ-a.

Pitanja Alana vezano za realizaciju plana sječe u postotcima na području općine Ilijaš, a koliko u drugim općinama u Kantonu Sarajevo – procentualno ne mogu odgovoriti, a na nivou prošle godine je ukupno posječeno manje cca 20.000,00 m<sup>3</sup> od planiranog, što znači cca 6.000,00 m<sup>3</sup> manje na području općine Ilijaš. Posljedica je pandemije, nerada, slabog plasmana robe itd.

Pitanja načelnika, novi OKFŠ i neko je pitao za nenamjensko trošenje ovih sredstava – nenamjensko trošenje sredstava od ove uprave se nije vršilo, jer OKFŠ u 2020. godini nikako nije potpisan. U 2020. godini se radilo na realizaciji projekata iz OKFŠ-a koji su potpisani u 2019. godini.

Pitanje za sadni materijal – mi jesmo nabavili određenu količinu sadnog materijala i naši kapaciteti u rasadniku nisu toliki da možemo odgovoriti vlastitom proizvodnjom sadnog materijala i svake godine se nabavlja određena količina. Dio pošumljavanja je vlastitom proizvodnjom sadnog materijala, a dio je nabavljen. Novi OKFŠ još uvijek nije napravljen, ni spisak projekata, ni putnih dionica. Što se tiče upisa vlasništva na Sarajevo-šume i nama je to vrsta tereta i mi kao preduzeće, sami o tome ne možemo odlučiti bez vlasnika. To je procedura koja je moguća, ali malo duže traje.

HALIL SULEJMANOVIĆ – v.d. izvršni direktor Sarajevo-šuma

Većinu stvari koje ste pitali prenio je kolega Hasković, ali da li se slažem sa bivšom Upravom ili ne, to nije tema ove sjednice. Dopunit ću samo neke odgovore. Vezano za dva člana Uprave koji su sami sebi potpisali Ugovore o radu, to pravno tako izgleda kada tri člana Uprave u ime Uprave odlučuju sa jedne strane vezano za ugovore, a sa druge strane radnici, za iste te ugovore potpisuju, kao druga strana potpisnica. Da li je tu napravljena greška, to nećemo ovdje danas odlučivati, nego ćemo to proslijediti onom ko je nadležan za to, a u našoj je moći šta treba da uradimo, da zakonski rasporedimo kolegu Haskovića, obzirom da je sam sebe indentificirao sa ovim Ugovorima i kolegu Nermina Demirovića u skladu sa njihovim stručnim zvanjem i radnim iskustvom. To neće biti problem i nadam se da će u preduzeću biti dobro volje da se oni ostave na nekim pozicijama koje odgovaraju njihovoj radnoj sposobnosti, kvalifikacijama, ali i nekom radnom i ljudskom dignitetu.

Pitanje vijećnika Handžića za 119 uposlenika, od kojih rekli ste 106 iz Ilijaša je zaposleno na neodređeno i možda kada gledam lokalno, patriotski i kada pričam sa vama ovdje u Ilijašu mogu tako da razvrstavam tako, ali nama su svi radnici isti bez obzira s kojeg dijela kantona dolaze. Zašto se u prethodnim godinama nije pristupilo zapošljavanju ovih radnika nije pitanje, ni lokalni patriotizam, niti bilo šta drugo, nego nerad po pitanju sistematizacije radnih mjesta. Sistematizacija radnih mjesta u Sarajevo-šumama je rađena davne 2010. godine, tako da sada imamo radna mjesta koja su prepunjena (imamo propisanih 16 domara-štalara, a već ih imamo 34). Generalno, mislim da ćemo to riješiti sa nedavno donesenom Uredbom. Imamo dosta uposlenika koji su postali invalidi rada, kojima je smanjena radna sposobnost i ne možemo da ih rasporedimo s obzirom na njihove nalaze i presude koje nas na to obavezuju. U narednom periodu će se izvršiti sistematizacija i uvesti određene službe koje oni mogu da obnašaju i rade određene poslove, ali isto tako

ćemo se potruditi da onim preduzećima u kojima budu mogli obavljati određene poslove da ih preraspodjelimo. Mjesečna obaveza preduzeća prema tim radnicima (cca 80) koj su invalidi rada je cca 200.000,00 KM, što znači da nas oni godišnje koštaju cca 2.500.000,00 KM.

Mišljenje o imovini preduzeća u Zaostrogu i neka mišljenja kolega Haskovića i mene se neće podudariti, a i ne moraju. Bez obzira da li smo bili promptno i na vrijeme obaviješteni da je došlo do prodaje te nekretnine, nismo trebali na to da se oglušimo i da uzmemo sredstva koja su oprihodovana tom prodajom, nego smo trebali da prijavimo sve nadležne iz drvne industrije Zvijezde, odnosno drvne industrije Šumarstvo Vareš. Bez obzira da li smo bili uknjiženi, a uknjižena je bila ŠIPAD OOUR čiji smo pravni sljednici, bitno je bilo šta smo mogli zakonski uraditi. To ćemo prepustiti organu koji treba da se bavi tim dijelom. Pitanja za asfaltiranje šumskih puteva, odnosno puteva kroz naseljene dijelove, a koji istovremeno trebaju i nama kao šumarstvu – kako ti putevi trebaju da budu na usluzi građanima, tako treba da imamo na umu da je šumsko privredna osnova nešto što mi treba da radimo i to proizilazi iz Zakona, iz plana na koji vi godišnje dajete samo mišljenje. Obaveza nam je da izvršimo sječu određenih stabala i putevi koje mi asfaltiramo su dobrobit za stanovništvo, ali s druge strane su negativni po pitanju šumarstva zato što imamo veoma teške mašine i kada prelazimo preko asfaltiranih puteva moramo iznalaziti rješenja koja nisu najjeftinija. Molim vas, ako se neke ceste i unište, mi ćemo naći rješenje da te puteve popravimo, ali nemojte da mi budemo prekretnica koja će svima dati za pravo da se protivi prolazanju kamiona Šumarstva, jer je to nešto što je od prijeke potrebe, a mi ćemo se u narednom periodu potruditi da te puteve asfaltiramo, popravimo, bez obzira čiji je to cilj i da ništa ne oskudijeva u odnosu kako je bilo do sada. Ali isto tako moram reći da sredstva OKFŠ-a bez obzira kako ih mi smatrali ovdje, općini mogu da služe za asfaltiranje puteva, a nama su asfaltiranje puteva i završni sloj puteva na zadnjem mjestu, kada je u pitanju OKFŠ, kao šumarstvu i morao je da bude. Zašto? Zato što mi iz tih sredstava iznalazimo mogućnosti da pošumljavamo, očistimo šumu i da na taj način uradimo sve slojeve do asfaltiranog puta, zato što nama asfaltirani putevi nisu 100% kvalitetna rješenja za naše potrebe.

Pitanje vijećnika Šeraka da li su se sredstva trošila namjenski ili nenamjenski – Uprava je nešto što je kontinuitet. Da li se imena unutar toga mijenjaju? Da. Reći ću da su se sredstva generalno trošila nenamjenski. Kada dobijete kreditna sredstva u private svrhe da napravite bilo šta, banka vam daje da opravdate ta sredstva. I mi to treba da radimo i ta sredstva ne bi trebalo da diramo sa računa ili bi trebalo da ih osiguramo ili rezervišemo po nekom pitanju, ili da ih odmah utrošimo ako nismo u mogućnosti da ih sačuvamo za potrebe za koje treba da ih koristimo. Generalno, mi smo 23.04.2021. godine zatekli preduzeće koje nije imalo sredstva koja smo trebali da utrošimo za OKFŠ projekte, imali smo sredstva za tekuće rashode. Tako da jeste došlo do nenamjenskog utroška, ali ćemo se potruditi u narednom periodu da to stignemo.

Pitanje načelnika – ja vas pozivam načelnice da u što kraćem vremenu, a vezano za pozajmišta, za puteve, asfaltnu i drugu šumsku infrastrukturu, održimo sastanak na temu šumarstva i općine Ilijaš i mislim da saradnja između šumarstva i općine Ilijaš treba da bude u narednom periodu bolja, najbolja nego što je ikada bila i da riješimo sve projekte koje imamo i zajedničke, a u određenim trenucima da izađemo vama u susret ono što je vaša potreba i potreba ove općine. Što se tiče upisa zemlje, 2003. godine je došlo do izmjena upisa uloga u knjigu i registar privrednih subjekata u Kantonu Sarajevo. Naš ulog je trenutačno 10.000,00 KM. Svaki put kada revizija dođe u preduzeće, pronađe problem u neupisanim ulozima od 345.000.000,00 KM u vrijednosti šuma. Tako kada bi naglo izvršili upis tih šuma, a da ih prije ne revidiramo i da ne izvršimo ponovni upis šuma, proizveli bi velike probleme za naše preduzeće. Isto tako, težit ćemo da to uradimo u narednih 24 do

36 mjeseci.

DENIS KAHRIMAN – predstavnik Uprave za šumarstvo

Pitanja za Upravu za šumarstvo su prokopavanja, lovački objekat-kuća na Koritima, bespravne sječe, OKFŠ i uništeni asfaltni put Povoča – što se tiče OKFŠ-a i namjenskih sredstava, Pravilnikom o postupku i kriterijima za dodjelu namjenskih sredstava u oblasti šumarstva iz Budžeta Kantona Sarajevo predviđeno je ko ima pravo na ova sredstva i u koje svrhe se mogu koristiti. U svrhe u koje se mogu koristiti ova sredstva ima 15 stavki, a između ostalih navodi se i provođenje procesa deminiranja šuma i šumskog zemljišta, a ovo govorim zato što ću se nadovezati na uništeni put u Povoči, zatim izgradnja i održavanje i unapređenje šumske putne infrastrukture. Radovi u okviru ovih projekata moraju biti u funkciji protiv-požarne zaštite i optimalnog gospodarenja šumama. Znači, ima 15 stavki u koje svrhe se mogu koristiti OKFŠ-a. Ni u kom slučaju nije stavka samo asfaltiranje puteva i to moramo imati u vidu. Što se tiče uništenog puta u Povoči, desilo se da je prije nekoliko godina od strane nepoznatog počinioca namjernom paljevinom izazvan je požar koji je zahvatio kompletan kanjon Povoče i došao preko brda do magistralnog puta Sarajevo-Tuzla. Posljedica toga je da su se počela sušiti dva odjela i sada prilikom vremenskih nepogoda ta oštećena stabla sama padaju i zbog nagiba terena slijeću na lokalni put Solakovići. Tako se desilo i ovom slučaju gospodine Bešlija. Vi ste obavijestili Sarajevo-šume i općinu i ispostavilo se da je stablo palo samo. S tim u vezi, pokrenuli smo inicijativu sa CZ općine Ilijaš, održali smo sastanak sa BH MAC-om da ih iniciramo da naprave projekat da se taj dio Povoče deminira. Dobrobit bi bila višestruka za sve. Da li se transparentno ili ne, koriste sredstva OKFŠ-a, neću reći ništa, a mogu reći da je na tužilaštvu otvoren postupak po pitanju ranijih godina i tužilaštvo će donijeti odluku da, ili ne.

Bespravna sječa – 1792 m<sup>3</sup> su registrovana na području općine Ilijaš, od toga je 800 i nešto m<sup>3</sup> u državnim šumama, 900 i nešto m<sup>3</sup> u privatnim šumama. Postavlja se pitanje zašto se ovo dešava i u privatnim šumama? Više je razloga, a zahvaljujući općini Ilijaš, odnosno procesu harmonizacije, uspostavljanje novog premjera koji je već 2-3 godine aktuelan i u velikoj mjeri se broj bespravnih sječa smanjio u privatnim šumama. Obim bespravnih sječa je u znatnoj mjeri smanjen u odnosu na prethodne godine na što je uticalo uspostavljanje novog premjera, u velikoj mjeri je uticalao to što je Federalna inspekcija prije nekoliko godina zapečatila veći broj nelegalnih reznih jedinica. Obim bespravnih sječa može biti daleko manji, međutim, odgovorno tvrdim da uposlenici Uprave za šumarstvo ( ne bih se složio sa konstatacijom da ima dovoljno šumara uzevši u obzir kolika je površina), ne mogu sami riješiti problem bespravne sječe šuma. Predlažem OV-u da zakaže tematsku sjednicu sa predstavnicima Uprave za šumarstvo, Sarajevo-šuma, MUP-a, sudstva i tužilaštva.

Pitanje za objekat na Koritima – gospodine Handžiću, po Zakonu o šumama, poštujući sve, u koje svrhe je taj objekat napravljen, koju je svrhu imao u ratu itd., članom 43. se kaže "Zabranjeno je svako neovlašteno zauzimanje državnih šuma i šumskog zemljišta". Ovaj objekat je izgrađen na državnom zemljištu, odjel 5, gospodarska jedinica Gornja Ljubina. Nekoliko puta sam predsjedniku Lovačkog društva Nusretu Bešliji, kada je počela izgradnja tog objekta, pokušao skrenuti pažnju i objasniti da bi trebao legalnim putem dobiti prateću dokumentaciju, pa tek onda krenuti u izgradnju objekta. Ide se obrnutim redoslijedom, a reonski čuvar šuma je odgovoran za sve protiv-zakonite radnje na terenu. Za njega je to neovlašteno zauzimanje državnog zemljišta. Objekat je izgrađen bez odobrenja, bez ikakve prateće dokumentacije.

Što se tiče prokopavanja – prokopavanja nekih putnih pravaca, to ni u kom slučaju nisu

glavni putni pravci, nitu putni pravci koji idu prema lokalnom selu ili privatnom posjedu. To su prekopavanja šumskih puteva i traktorskih vlaka koje su u dobrom stanju i kojim se može izvršiti transport bespravno isječene drvne mase.

MUHAMED HANDŽIĆ – vijećnik SBB-a

Nisam očekivao konkretniji odgovor, a na Koritima nije urađen ni Regulacioni plan, ni Prostorni plan, a kuća smeta. Adnan Delić ne zna gdje je ta kuća na Koritima, nego ona smeta nekome od vas trojice i ne mogu imati poštovanja prema vama kada tako postupate prema onome što smo mi krvarili za ovu zemlju. Sada mi govorite, vlasništvo je u pitanju. Tako se vi ponašate iz Sarajevo-šuma i Uprave za šumarstvo prema ovome što dokazuje našu krvavu borbu u proteklom ratu. Ovo Vijeće nije cirkus i naravno da ćemo imati tematsku sjednicu, tražit ćemo pojačanje za čuvanje šuma, ali ne način da nam presijecate puteve i nisu to samo šumski putevi.

ALAN ŠERAK – vijećnik SDP-a

Ovdje je sporan objekat koji je imao određenu namjenu u određenom periodu po pitanju odbrane BiH. Gospodin Kahrman vam je obrazložio šta je sporno. Sporno je to da se propisi ove države moraju poštovati. Nemojte očekivati da će neko kršiti Zakona zato što je naša vizija ovakva ili onakva. Ja apeliram na Upravu za šumarstvo, ako postoji mogućnost da se izvrši legalizacija tog objekta, dajte da se to uradi i da nema više populističke priče “mi ćemo nešto srušiti” i sl. Ovo je postao pravi politički poligon da se mi sukobljavamo oko nekih stvari samo iz razloga što državne institucije moraju da poštuju propise koji su doneseni od strane ove države. Zamolit ću sve koji mogu uticati da se iznađe način da se taj objekat ne ruši i da se ispoštuju svi zakonski propisi.

SEID BEKTIĆ – vijećnik SDA

Pitanje:

1. Dug Sarajevo-šuma u prethodnom periodu i sada, da li se smanjivao ili se i dalje povećava?

ADNAN ABADŽIJA – vijećnik NIP-a

Predlažem Upravi za šumarstvo, obzirom da nemate dovoljno šumara, da otvorite jedan telefonski broj kako bi građani prijavljivali nelegalnu sječu. Također, potrebno je da prokopane puteve vratite u funkciju.

Što se tiče lovačke kuće, ako je data koncesija Lovačkom društvu na korištenje lovišta po šumama, varijanta može biti da se da koncesija korištenja tog dijela zemljišta gdje je napravljen taj objekat.

AKIF BEŠLIJA – vijećnik SBB-a

Pitanja:

1. Ono što Haskoviću nisam razumio, kada dođe do prokopavanja, a kažete da niste upoznati kao Sarajevo-šuma, ko daje mašine za prokopavanje istih? Ko odobrava i kome se daju?
2. Ono što me boli i što jeste istina je da se prokopavaju putevi od javnog značaja. Navest ću primjer – put koji povezuju Taračin do i Kamenicu, put Ljetovik-Gora je

prokopan i to je put od javnog značaja. Nedavno se tu dogodio požara i zbog takvih stvari se nije moglo prići da se ugasi požar u tom reonu gdje je prokopan put. Ja dolazim iz oblasti lovstva i mi imamo lovno gospodarsku osnovu, kao i vi što imate šumsko gospodarsku osnovu koja je snazi deset godina i kako ćemo provesti planirane aktivnosti ako su putevi prokopani.

Problematiku nedostatka šuma trebate iznijeti na višim nivoima, jer Vijeće nije nadležno za to.

Šteta koja je nastala na putu Povoča, slažem da je nastala prirodnim padom drveća, ali isto tako neko je odgovoran za taj materijal, neko je to prodao, unovčio i u tom dijelu ste odgovorni, a za popravku puta niste odgovorni zato što se desilo prirodnim putem i ja to ne mogu da prihvatim i shvatim.

MEHMED SINANOVIĆ – vijećnik SDA

Osvrnut ću se na konstataciju Halila Sulejmanovića vezano za saradnju općine Ilijaš i Sarajevo-šuma da se u narednom periodu planira povećanje te saradnje, ja sam evo drugi mandate u ovom Vijeću i u proteklom periodu je ova saradnja bila na visokom nivou i nadam se da će se i nastaviti tako.

ALMIR ŠPIODIĆ – vijećnik NIP-a

Načelnik je pokušao kroz svoja pitanja i diskusiju da kaže kako mi ovdje nismo nadležni i postavljamo pogrešna pitanja, zadiremo u segment poslovanja, to je nadležan Kanton itd. Razumijem da ne možemo ocjenjivati i odlučivati o poslovanju preduzeća Sarajevo-šume, ali nas se tiče kako posluje ovo preduzeće, jer većinu svojih aktivnosti provode na našoj općini i važno nam je da poslovanje bude pozitivno iz razloga što i mi, kao općina, ostvarujemo određene benefite. Kolega Hasković je u većini slučajeva konkretno odgovorio na postavljena pitanja, kolega Sulejmanović je takođe iznio bitne činjenice kada je u pitanju poslovanje i za ubuduće. Neupitno je i nema sumnje da će saradnja između općine Ilijaš i JKP Sarajevo-šume biti ista ili čak i bolja, ono čemu mi težimo, nego u prethodnom periodu, i nema potrebe za pravljenjem, kao što kolega Šerak reče, političkog poligona od ovoga. Važno nam je da ovo preduzeće posluje dobro, jer kako mi je kolega Hasković objasnio, najveći broj dugovanja je proizašao iz javnih nabavki. I ja takođe sumnjam da je najveći problem lošeg poslovanja proizašao iz javnih nabavki i zbog toga je napravljen i gubitak.

ALEMA DŽAFO – vijećnica NIP-a

Zahvalila se svima na izlaganjima, uputila čestitke novoj Upravi preduzeća, te izrazila nadu da će se uskoro riješiti mnogo nagomilanih problema u Sarajevo-šumama, smanjiti gubici, kao i dugovanja prema općini Ilijaš i da će Uprava iznaći rješenja za sve radnike koji su pod ugovorima na određeno i da će se uskoro izvršiti sistematizacija radnih mjesta.

DENIS DILBEROVIĆ – vijećnik SDA

Konstatacija Halila Sulejmanovića mi je “zaparala” uši. Izjava “mi moramo, mi ćemo sjeći šumu, a prioritet nije asfaltiranja puteva” ne stoji. Zbog čega ne stoji? Većina odjela koje sječete na gornjem kraju prolaze kroz sela. Većina tih puteva je aktivnošću našeg

načelnika i Vijeća u dosadašnjem periodu asfaltirana. Više puta se spominjalo da ti putevi vode do nekih vikendica, ali obidite te puteve i vidjete ćete da put Gajevi-Dragoradi vode prema 100 domaćinstava. Mi smo uradili 4 km od 9 km tog puta, ostalo nam je još 5 km. Mi vas molimo da uradimo i ovih 5 km. Ni jedan odjel ne možete izvući, a da ne pređete preko tih puteva. Nama je prioritet asfaltirani put i nama to znači život, jer ako nemamo asfaltiranih puteva mi možemo odozgo odseliti. Molim vas, prenesite gore, iskoristite svoju poziciju ovdje, ako vas uvažavaju u Sarajevu, da je nama u planini prioritet asfaltiranje puteva. Gospodine Sulejmanoviću, ne možete tako nešto izjaviti. Nemojte onda hodati po tim putevima, nemojte da vaši kamioni gaze po asfaltnim putevima, nađite sebi neke druge trase, ali ne možete izvesti sve asfaltnim putem i onda reći "nama nije prioritet asfaltiranje puteva", a vi polomili puteve. Mi nećemo vama zabraniti da vaši kamioni idu tim putem, ali molim vas da ga popravite. Znači, da svake godine uradite 1-2 km asfaltnog puta prema Gajevima, Dragoradima, Kamenici, Koritima itd. Nemojte nam povlačiti ta sredstva ako ih niste nadoknadili iz nekog drugog izvora. Ja govorim u ime građana gornjeg kraja. Ne možete ukinuti sredstva i reći mi moramo sjeći, a asfalt nam nije prioritet. Nemojte lomiti put, ako vam to nije prioritet.

ALMIR ŠPIODIĆ – vijećnik NIP-a (replika)

Kako to Denis prezentuje, ja ne znam da li ste vi dobro slušali ili ja nisam dobro shvatio. Jedan od prioriteta, koji nije u prioritetu, je asfaltiranje puteva. Ljudima odgovaraju više makadamski putevi, ali će učestvovati u finansiranju toga. Konstantno spominjete kako ste vi nešto uradili, mi smo, načelnik, ja sam, itd. Išao sam ja na gornji kraj i vidio sam da je asfalt prošle godine urađen do štale predsjednika Savjeta MZ Gajevi. Išao sam i na asfalt u Vrutke za koje pričate da ste uradili gdje je debljina asfalta 3-5 cm i tako ste godinama trošili sredstva OKFŠ-a. Sada kada vam nije do kraja urađeno tih puteva što treba da bude i to bi vi da fakturišete nekome i kažete vi trebate kao nešto dodatno nama raditi, vi nećete. Unaprijed govorite stvari za koje ne možete tvrditi da vam neko neće uraditi. Sve što se ošteti puteva, smatram da bilo koja Uprava treba sanirati. Putevi su prijeko potrebni, posebno građanima koji žive na udaljenim mjestima općine Ilijaš. Sada nekome što u jednoj godini ne uradi ili ne stigne ili ne bude imao sredstava s obzirom da je pandemija i prošle i ove godine, fakturirati kao vi to nešto nećete da radite. Politički postavljate pitanja, politički vam i odgovaram i nekorektno je s vaše strane gospodine Denise.

DENIS DILBEROVIĆ – vijećnik SDA (replika)

Ja nisam govorio politički. Činjenica je da je načelnik općine gospodin Akif Fazlić zadnjih osam godina, činjenica je da su ljudi na zborovima građana predlagali putne pravce, činjenica je da su Savjeti mjesnih zajednica dostavili svoje prijedloge prema nadležnim službama, činjenica je da su ti prijedlozi u Operativnom planu i činjenica je da su putevi urađeni po Operativnom planu. O čemu vi pričate gospodine Špiodiću? Urađeni su putevi, a ne znam gdje je tu vikendica.

ALMIR ŠPIODIĆ – vijećnik NIP-a (replika)

Ja sam samo htio da kažem činjenice. Kažete imaju zborovi građana, operativni planovi. Evo da pitam načelnika, da li je u Donjem Selu, po Operativnom planu, asfaltiranje puta do štale predsjednika Savjeta MZ Gajevi?

ALMA OMEROVIĆ – predsjedavajuća

Sugerisala je vijećnicima Denisu i Almiru da se drže tačke dnevnog reda, da poštuju tuđe vrijeme i da budu precizni i koncizni, a ne da postavljaju pitanja načelniku.

ALMIR ŠPIODIĆ – vijećnik NIP-a (replika)

Denis spominje da mi pričamo o asfaltiranju puteva do vikendica. Molim vas da me podsjetite ko je danas spomenuo bilo kakvu vikendicu? Ne znam uopšte o kakvim vikenticama govorite. Spominjete da mi to govorimo, što nije istina.

ADNAN ABADŽIJA – vijećnik NIP-a (replika)

Putevi su javni i mislim da Sarajevo-šume imaju svoje prioritete za OKFŠ sredstva. Mi, kao vijećnici, nećemo ulaziti u te prioritete, da li će oni vršiti pošumljavanje, da li će isjeći dovoljno drveta, prodati ga privrednicima. Svi ti putevi ako su asfaltirani i ako su urađeni u prošloj godini, trebalo bi da su održivi bar onoliko koliko imaju garanciju i nadam se da su urađeni kvalitetno.

HALID DIZDAREVIĆ – vijećnik SDA (replika)

Kada se kolega Denis referisao na izvještaj Halila Sulejmanovića, niti jednom rečenicom nije derogirao diskusiju kolege Špiodića i ne znači da je kolega Špiodiću vaša diskusija završna riječ ovdje, pa se ljutite što se Denis referiše na izvještaj Halila koji je i sam kazao da nisu baš onakve stvari u šumarstvu kakve se čine kada niste tu. Denis je mišljenja kao i ja da je putna komunikacija na gornjem kraju jako bitna zato što to nisu putne komunikacije od 1-2 km, nego su to velike putne komunikacije i evo kolega Adnan, Meho, Denis se zalažu da se rade ti putni pravci i nisam vidio da je bilo ko protiv toga. Međutim, imamo pravo kao vijećnici, kao Denis, da sugerišemo da se to nastavi, da se saradnja sa Sarajevo-šumama nastavi kao u prethodnom periodu što je bila na dobrom nivou i niko to ne osporava i cijenimo da moramo da ulažemo u te pravce od OKFŠ-a, od svih sredstava zajedno sa općinskim sredstvima. Dakle, to je suština. Rekli ste da ovo ne koristimo kao političku platformu, a vi to upravo radite.

ALMIR ŠPIODIĆ – vijećnik NIP-a (krivi navod)

Predsjedavajuća, da li ste trebali prekinuti izlaganje kada sam tražio ispravku krivog navoda?

ALMA OMEROVIĆ – predsjedavajuća

Praktikujemo da ne prekidamo automatski.

HALID DIZDAREVIĆ – vijećnik SDA (poslovnička intervencija)

U Poslovniku stoji da kada neko traži krivi navod, pusti govornika da završi i kaže šta je krivi navod.



ALMIR ŠPIODIĆ – vijećnik NIP-a (krivi navod)

Hvala kolega, vidim da vi poznajete Poslovnik i imate malo bolje znanje, pa ste mi odmah odgovorili.

ALMA OMEROVIĆ – predsjedavajuća (krivi navod)

Vi konstantno pokušavate, kao i druge kolege, da obezvrijedite moj rad. Ako vam je to jedini cilj da se dokazujete, nije nikakav problem i ako je to “frajerisanje” ja vam čestitam i izvolite ispravite krivi navod.

ALAN ŠERAK – vijećnik SDP-a (poslovnička intervencija)

Maloprije ste rekli krivi navod se uzima ili daje kada prethodnik završi diskusiju. Vi ste sada na izlaganje kolege Špiodića rekli imam krivi navod i odmah ste ga prekinuli u izlaganju. Sada ću vas zamoliti da vi meni pojasnite ove dvije situacije.

ALMA OMEROVIĆ – predsjedavajuća

Ovo što sam maloprije kazala je potpunu ispravan navod o čemu ja govorim.

ALMIR ŠPIODIĆ – vijećnik NIP-a (krivi navod)

Kolega Halid je naveo krivi navod da sam rekao da sa mojom diskusijom završavam priču, što nije tačno. Niko vam ne zabranjuje da diskutujete i Poslovnik mi daje za pravo da se ne složim sa vašom diskusijom i da uputim repliku.

MUHAMED HANDŽIĆ – vijećnik SBB-a (replika)

Govorimo o šumarstvu, o Sarajevo-šumama i fokusirajmo se na to. Prethodna struktura rukovodstva Sarajevo-šuma i Uprave za šumarstvo je optužena kao što smo čuli kroz izlaganja i neka se brani, Ako su krivi neka odgovaraju.

ALAN ŠERAK – vijećnik SDP-a (poslovnička intervencija)

Predsjedavajuća, zamolit ću vas da kolegu vratite na tačku dnevnog reda.

ALMA OMEROVIĆ – predsjedavajuća

Kolega nastavite.

MUHAMED HANDŽIĆ – vijećnik SBB-a (replika)

Ako su krivi neka odgovaraju. Ovi drugi ih optužuju, ovi koji su došli na vlast, i njihov zadatak je da smanje dugove i vidjet ćemo i to. Moj je utisak da su ovi koji su došli, raspoloženi rušilački. Rušili bi ono što je izgrađeno.

ALAN ŠERAK – vijećnik SDP-a (poslovnička intervencija)

Zamolio bih vas predsjedavajuća da gospodina vratite na tačku dnevnog reda.

ALMA OMEROVIĆ – predsjedavajuća

Kolega nastavite.

MUHAMED HANDŽIĆ – vijećnik SBB-a (replika)

Ovi nam govore da ruše lovačku kuću, uskraćuju sredstva OKFŠ-a kao nismo ih namjenski koristili. Kada kažem “mi”, mislim na općinu Ilijaš, jer sam na raspolaganju građanima općine Ilijaš, a nikako ni jednoj Stranci, ni jednoj strani. Predlažem da se radi, a ilijašani koji predstavljaju nas u institucijama ili službama, budite pravi ilijašani i gledajte šta ćete uraditi ovdje, a nikako šta ćete srušiti i kako ćete nam osporiti neka sredstva koja su i vama potrebna. Kolega Adnan je predložio da se na jednoj krivini radi put. Od čega? Puteve moraju popraviti oni koji ih lome. Ako nema sredstava OKFŠ-a, na koji način popraviti puteve?

ALMIR ŠPIODIĆ – vijećnik NIP-a (replika)

Kolega Handžiću, nikoga ni u jednoj rečenici nisam optužio, od postavljanja pitanja, pa sve dok me niste uvukli u ovu raspravu gdje smo svi “fulali” temu. S obzirom da predsjedavajuća vas nije prekida, zamolit ću je da i mene ne prekida. Možemo preslušati stenogram i uvjeriti se da nikoga nisam optužio. Sva moja pitanja su bila vezana za Upravu i šumarstvo. Nekorektno je reći da je došla neka rušilačka politika. Ako su ljudi mjesec dana na vlasti i nekoga optužimo da je rušilačka politika, za mene je to nekorektno. Ne mogu nas srušiti koliko smo srušeni kao država, kao ljudi i kao narod. Ako nam ne mogu pomoći, nadam se da nas neće više ni srušiti nego na kojem smo levelu.

ALMA OMEROVIĆ – predsjedavajuća

Zamolit ću kolege da se vratimo na tačku dnevnog reda.

ADNAN ABADŽIJA – vijećnik NIP-a (replika)

Replika na “rušenje”. Kolega Handžiću, vi, kao Lovačko udruženje, ste izašli iz pravnih okvira i napravili ste bespravno objekat, ali sam ipak predložio da se to legalizuje, i kolega Šerak je predložio.

Niko neće rušiti asfalte, nego smo kazali da je trebalo uraditi kvalitetnije. Detalje koje spominjete, kako je neko sada radio, da li su ovi prije u šumarstvu bili ovakvi ili onakvi to nas ne interesuje. Imaju ljudi svoje vizije, svoj plan rada gdje sredstva troše i kako rade. I ne možemo reći mi smo napravili put, a vi hoćete da ga srušite. Ko mi? To su novci građana ove države. Da sam lično svojim sredstvima afaltirao put, onda bih rekao ja sam to uradio, a ne reći ovi hoće da ruše, mi smo uradili asfalt. Evo da vidim ko je dao marku od sebe da asfaltira put u Dragoradima.

Dakle, to su novci građana, a naravno da postoji neko ko upravlja, postoje propisi, akti kako se ta sredstva troše. Svako ko izađe iz zakonskih okvira, kad tad će biti procesuiran.

VERNESA BEŠLIJA – vijećnica NIP-a

Tražila je repliku.

ALMA OMEROVIĆ – predsjedavajuća

Kazala je da vijećnica Vernesa ne može replicirati, obzirom da se nije na vrijeme javila za repliku, te opomenula vijećnika Alana Šeraka za nekorektno ponašanje. Opomenu je uputila i drugi put i zatražila da Alan Šerak napusti sjednicu. Obzirom da to nije učinio, predsjedavajuća je prekinula sjednicu i kazala da će vijećnici u viber grupi biti obaviješteni o nastavku sjednice.

Pauza od 13:20 do 14:40 h

VERNESA BEŠLIJA – vijećnica NIP-a

Vijećnici su ovdje da postavljaju pitanja i na to imaju pravo, baš kao i vi kolega Handžiću i ne vidim razloga da govorite da mi kao nekoga optužujemo. To su samo pitanja. Obzirom da nisam uspjela ranije odgovoriti, kada ste rekli da je minister Delić bio u pelenama dok ste se vi borili, mislim da takve riječi za ovu salu nisu korektne i ubuduće predsjedavajuća da vodimo računa o ovim stvarima, da poštujemo jedni druge, jer ovo stvarno nije uredu.

ALMA OMEROVIĆ – predsjedavajuća

Zahvalila se na sugestiji i kazala da je bila u situaciji da kolegu prekine, ali on je vrlo brzo završio poslije te rečenice.

ADNAN ABADŽIJA – vijećnik NIP-a

Želim dati neke upute insititucijama, načelniku, Sarajevo-šumama i Upravi za šumarstvo da mi ne djelujemo putem nekih prijateljskih veza, mi kao vijećnici ili neke naše kolege iz Stranaka da putem poznanstva završavamo nekakve poslove kako se to, čini mi se, radilo u prethodnom periodu. Bez obzira na dešavanja kako se to radilo privatnim vezama, ja pozivam načelnika i ostale institucije da putem aplikacija apliciraju za sredstva OKFŠ-a, da se institucionalno djeluje. Također, pozivam načelnika da u skladu sa Zakonom pokuša iznaći mogućnost da se riješi ova lovačka kuća, a ne da mi radimo na način kako to ne dolikuje i kako Zakon ne propisuje.

ALMA OMEROVIĆ – predsjedavajuća

Sugerisala je da se vijećnici drže tačke dnevnog reda.

HALID DIZDAREVIĆ – vijećnik SDA (replika)

Kolega Adnan je sada na neki način rekao u ime Općinskog vijeća, da kao svi mi, stalno je koristio riječ “mi”, “vi”, “oni”, “neki”. Ako već pričamo o institucijama koje spominjete, nemojte govoriti da smo “mi”, kao imamo informacije sa terena da su nekada neki ljudi prijateljske veze koristili i radili nešto. To su insinuuacije. Ne možete takvu vrstu informacije stavljati u eter, bez ikakvih dokaza, bez da imate potporu tih informacija itd. Naveli ste “neki” su tamo radili nešto. Pa neka su. Ako su radili, postoje institucije da to provjere. U javnosti se svaša priča. Ovu salu nemojte koristiti da pravite pretpostavke da se nešto dešavalo.

#### AKIF BEŠLIJA – vijećnik SBB-a (replika)

Od strane kolege Abadžije, pa i drugih vijećnika se spominjala lovačka kuća. Lovačka kuća je rađena u saradnji sa mještanima tog sela i kao spomen soba. U tom smislu, koristite taj termin tj. lovačka kuća i spomen soba. Kada je u pitanju ova spomen soba na Koritima, isti status ima i lovačka kuća i spomen soba na Pogledinama gdje se uopšte nije dizala fama, niti dovođeno u pitanje da se ruši i ne treba da se diže, jer to jeste gajenje uspomena na period 1992.-1995. godina.

#### ALMIR ŠPIODIĆ – vijećnik NIP-a (replika)

Ne znam da li je kolega mislio ovo sve što je rekao "spomen soba i lovačka kuća zajedno". Spomen soba braniocima ove domovine da se uradi bez određene propratne dokumentacije, meni je to nelogično. Smatram da sve ono što nam može poslužiti kroz historiju da sačuva istinu na tekovine iz 1992.-1995. godine trebamo čuvati i sačuvati. Ali, da neko gradi nešto i kaže ovo je spomen soba bez saradnje sa institucijama, meni to nema logike.

#### ALAN ŠERAK – vijećnik SDP-a

Želim da izrazim zadovoljstvo što smo raznim politikama uspjeli da postavimo svoje ljude u Sarajevo-šume, jer Ilijaš itekako polaže određena prava da upravlja tim preduzećem. Apeliram na sadašnji menadžment da uradite sve što je u vašoj moći, prije svega da izmirite sve obaveze prema općini Ilijaš i u budućim projektima da posebnu pažnju posvetite ovoj lokalnoj zajednici. Što se tiče sporne kuće ili spomen sobe, delegirali ste to pitanje i neka ste. Ponovo apeliram na sve nadležne da iskoriste sva moguća prava kako bi se to vratilo u zakonska okvire i nadam se da ćemo uspjeti zajedničkim djelovanjem uspjeti riješiti sporno pitanje i da će ona ostati na mjestu gdje jeste upravo iz simboličkih razloga, jer ne treba zaboraviti period 1992.-1995. godina, a ujedno ću i vas zamoliti da se ubuduće suzdržite od diskusija koje vode politikanstvu kako bi se neke stvari fakturisale nekim novim ljudima. Nemojte to raditi, pružite ljudima šansu da vidimo šta će uraditi u narednoj godini. Ja se nadam na opšte zadovoljstvo da će oni biti što uspješniji, jer svakako mi, kao lokalna zajednica, imamo interesa da oni posluju što bolje kako bi smo i mi imali što više koristi od strane rada i djelovanja preduzeća Sarajevo-šume.

#### AKIF FAZLIĆ – općinski načelnik

Ovo je jedna jako važna tačka, lijepo obrađena i s aspekta informacija koje smo dobili od Uprave za šumarstvo i Sarajevo-šuma i dosta kvalitetnih diskusija i mi to pokvarimo evo skoro sat i pol sa našim ispravkama krivih navoda i sl., ali to je pravo vijećnika, ali kroz vrijeme izgubi se srž i kvalitet, jer po ovoj tački se stvarno kvalitetno radilo. Očitovat ću se po tri pitanja i predložiti neke inicijative.

Denis Kahrman je inicirao održavanje tematske sjednice, ali ja nisam pobornik toga. Nekada smo imali te tematske sjednice i uvlačili se u nešto što nije naš posao. Pitanje nelegalnih sječa šuma je pitanje institucija: uprave, policije, tužilaštva, suda. Ja sam za to da Vijeće traži odgovornost od svih ovih institucija koje su nadležne.

Dalje, puno smo pričali o namjeni sredstava OKFŠ-a i generalizirali stvar kako se ona nenamjenski troše. Ne želim ulaziti u ono što se na cijelom kantonu i dugi niz godina to realiziralo i kako se realiziralo i ne stojim ni iza jedne te stvari, ali hoću kazati da je Općina Ilijaš na regularan način aplicirala na ta sredstva, potpisivala Sporazume i realizirala ih i

potpuno su namjenski utrošena i zna se svaki put koji je isfinansiran iz OKFŠ-a i to nema veza sa onim lokalnim putevima po selima, jer u osnovi su rađeni, uslovno rečeno, magistralni lokalni putevi. Niz puteva u selima na gornjem kraju je asfaltiran, prije svega, iz sredstava Budžeta Općine Ilijaš i sredstava Ministarstva saobraćaja Kantona Sarajevo. Poziv svima, identifikacija puteva koji su finansirani sredstvima OKFŠ-a, s ponosom mislim da smo ih mi zajedno definisali kroz Operativne planove i da smo ih uradili. Dodatno, kada je u pitanju saobraćajna infrastruktura moramo to sagledati da je to zajednički interes Sarajevo-šuma i građana. Razumijem i ovo što je Halil govorio, ali nemojmo da pravimo put do puta, asfaltni put za građane Gajeva ili Vrutaka ili Dragorada, a neki makadamski zbog održavanja tog puta puno trpi za kamione. Mi trebamo zajedničkim sredstvima praviti moderne puteve, da ih održavamo i mislim da je to način kako saobraćajnu infrastrukturu i politiku njene eksploatacije korištenja tih puteva definisati.

Vezano za ono ko je zaslužan, ko nije zaslužan – ja kažem da je zaslužna naša lokalna zajednica, naša lokalna politika, ljudi koji su učestvovali u tome, ali ne prihvatam samo ovo "to su sredstva građana i to su građani uradili". Sredstva građana Općine Ilijaš kada dođu na Budžet Kantona neće doći sama odozgo ako neko odavde programski, politički ili kako već ne nastupi i izbori se za ta sredstva. Politike, programi, ispravna orijentacija je nešto ko će ta sredstva povući. Mi smo ih uspješno povlačili i ne trebamo da se stidimo i omalovažamo nekoga ko je uspješno povlačio ta sredstva. U osnovi, mislim da je Općina Ilijaš kroz čitav niz godina, ne samo ova sredstva, nego generalno, prema pristupu kako se dolazi do sredstava i s aspekta kvalitetnih programa, politika i lobiranja i svih onih koji su učestvovali i svi trebamo učestvovati i doprinijeti po bilo kom osnovu da dođemo do tih sredstava.

Želim predložiti OV-e inicijative:

1. Inicijativa prema Ministarstvu privrede da OV-e Ilijaš inicira izmjenu Zakona o rudarstvu, kantonalnom, kojim će se definisati pitanje pozajmišta i omogućavanje Sarajevo-šumama da ta pozajmišta može koristiti.
2. Inicijativa prema Upravi za šume – inicijativa treba da ide u smjeru da Uprava nađe adekvatniji način zaštite šuma, adekvatniji terenski način kada je u pitanju fizičko prekopavanje komunikacija i nemogućnost komunikacije. Dakle, da se na ozbiljnijim šumskim putnim pravcima nađe adekvatan način funkcionisanja koji će služiti zaštiti šuma, ali koji neće dovoditi u pitanje neke brze reakcije zbog požara, djelovanja lovaca i svih drugih koji djeluju na tom prostoru.
3. Inicijativa prema Upravi za šume – obzirom da će odrediti izvođača za izradu šumsko-privredne osnove da tijesno sarađuju sa Općinom Ilijaš zbog izvorišta, putnih komunikacija kako bi dobili najadekvatniju i naprihvatljiviju šumsko-privrednu osnovu i za nas.
4. Inicijativa prema Sarajevo-šumama – naglasili su to u Informaciji, ali da i Vijeće tu inicijativu iskaže, a to je da nađe način kako ogrjevno drvo za naše stanovništvo obezbjediti na najadekvatniji način.
5. Inicijativa prema Sarajevo-šumama – da kod kandidiranja projekata za OKFŠ koje će Sarajevo-šume realizirati, da gledaju da se dio tih projekata odnosi na rekonstrukcije i sanacije lokalnih i šumskih puteva.
6. Inicijativa prema Sarajevo-šumama – neko je spomenuo ovu inicijativu, a to je projekat saobraćajne signalizacije. Da se zaduži resorna služba Općine Ilijaš i predstavnici Sarajevo-šuma da zajedno izdefinišu pitanje najadekvatnijeg korištenja lokalnih puteva i te saobraćajne signalizacije koja bi dovela do korektnijeg i boljeg korištenja i čuvanja puteva i koji bi bili na najbolji način u

funkciji i Sarajevo-šuma i građana. Ovdje mislim i na lagere, kamione koji znaju stajati na putevima.

ALMA OMEROVIĆ – predsjedavajuća

Mislim da su ove inicijative prihvatljive za sve i da u paketu glasamo kao Zaključak ili za slijedeću sjednicu, obzirom da smo zatvorili diskusije.

HALIL SULEJMANOVIĆ – izvršni direktor Sarajevo-šuma

Zahvalio se načelniku na inicijativi za izmjenu Zakona o šumarstvu koje je od ključnih i prioritetnih stvari koje su dobre za Sarajevo šume i stanovništvo.

Svi putevi su od zajedničkog interesa. Puteve koje je uradila Općina Ilijaš, a koja sredstva je putem kantonalnog ministarstva povukla KJP Sarajevo-šume, a koji su rađeni u 2016., 2017., 2018. godini, dočekali smo da u 2019. i 2020. godini postavljamo znakove zabranjeno kretanje kamionima i sredstvima težim od 5 tona. Mi nemamo mašine koju vozimo da je lakša od 5 tona. Ako napravimo te puteve i kažemo da su od zajedničkog interesa, ne mogu nam biti od zajedničkog interesa tri godine. Treba da nam budu od zajedničkog interesa dovijeka. Ako uz ove puteve nećemo raditi posebne šumske puteve, onda ti putevi moraju biti osposobljeni i mora se dozvoliti kretanje kamiona, čak kad bi to značilo da ćemo uništiti te puteve, naknadno ćemo iznalaziti rješenja da ih popravimo. Ali, postavljanje vertikalne signalizacije na mostu koji ide prema selu Ravne ili na mjestu u Šićima za koje je Sarajevo-šume kroz projekat 2015. i 2016. godine, za put Srednje-Šići i Srednje-Medojevići izdvojilo jedan milion KM izuzelo sredstva od Kantona, a projekat je vodila Općina Ilijaš i ako ta sredstva utrošimo na taj način i zabranimo kretanje kamionima i radnim mašinama Sarajevo-šuma, to nama predstavlja ogroman problem. Moramo po tom pitanju biti oprezni. Ako je nešto zajednički interes, onda je zajednički interes zauvijek, a ne na godinu, dvije ili tri.

Što se tiče smanjenje dugovanja i obaveza koje je postavio vijećnik Seid – dug koji smo zatekli 23.04.2021. godine od 3.763.000,00 KM, umanjili za cca 300.000,00 KM u ovih prvih trideset dana na način sa smo isplatiti zadnji dio regresa od 80.000,00 KM koji je ostao od prošle godine i molim vas da ovo ne bude politička tema u nastavku sjednice. Odgovorit ću kako je u finansijskom izvještaju iz prošle godine i kako jeste stanje u ovih trideset dana. Vratili smo uplatu prema Vanjsko-trgovinskoj komori, dug od 740.000,00 KM smanjili smo na 640.000,00 KM kada je u pitanju naknada prema općinama, oprihodovali dio sredstava koja moraju biti oprihodovana. Očekujemo da ćemo od 300 do 500.000,00 KM biti vraćeno u narednih trideset dana.

U fazi je doznačivanje ogrjevnog drveta u Općini Ilijaš, kao i na ostalim općinama koje će biti namijenjeno za stanovništvo.

Sistematizacija radnih mjesta – mi bi već ušli u proces sistematizacije radnih mjesta, ali to diktira kolektivni ugovor koji potpisujemo sa sindikatom i u narednom periodu će se imenovati članovi koji će učestvovati u izradi tog kolektivnog ugovora i kada on bude gotov pristupit ćemo izradi sistematizacije radnih mjesta.

Kada je u pitanju lovačka kuća – dva su moguća rješenja. Jedno, za koje mislim da je najprihvatljivije, je da Vijeće i Općina Ilijaš donesu da je to zemljište od javnog interesa i da se krene sa eksproprijacijom, a mi, kao Sarajevo-šume, obećavamo da ćemo se složiti s tim i obećavam da ćemo što je u našoj moći da riješimo taj problem.

DENIS KAHRIMAN – predstavnik Uprave za šumarstvo

Pitanje za stablo u Povoči koje je prirodnom nesrećom palo na asfaltni put i oštetilo ga – predato je Sarajevo-šumama ustaljenom procedurom.

Što se tiče sporne kuće, vijećnik Handžić je rekao da je lovačka kuća, ali mi imamo zvanični odgovor Lovačkog društva "Zec" Ilijaš, da to nije lovačka kuća. Također ste rekli Handžiću, da nas trojica prisutnih smatramo da je ovo "cirkus vijeće". Ja se ne mogu s Vama složiti. Više puta dolazim na sjednice OV-a kao gost, kao predstavnik Uprave za šumarstvo i sama činjenica da sam došao ovdje prije početka sjednice tj. prije 10:00 h, prije od polovine vijećnika, iako je ova tačka 4., dokazuje da ovo Vijeće smatram ozbiljnom institucijom i krajnje je nekorektno da kažete da ja smatram da je ovo cirkus vijeće.

Što se tiče ove kuće, ja kao uposlenik Ministarstva privrede, državni službenik, gospodine Handžiću, moram se pridržavati zakonskih odredbi. Prema tome, morate shvatiti ovu situaciju da se moramo pridržavati zakonskih regulativa.

ALMA OMEROVIĆ – predsjedavajuća

O inicijativa načelnika, očitovat ćemo se na slijedećoj sjednici OV-a.

Diskutanata po ovoj tački dnevno reda više nije bilo, pa je OV-e primilo k znanju

Informaciju u oblasti šumarstva

AD-5

Prijedlog Odluke o novčanim podrškama u poljoprivrednoj proizvodnji na području Općine Ilijaš za 2021. godinu

MERIMA OSMANOVIĆ – pomoćnica načelnika

Dala je uvodno obrazloženje. Prilikom utvrđivanja ovog Prijedloga odluke, predlagač se rukovodio slijedećim potrebama, činjenicama i mogućim efektima:

1. Usaglašenosti modela podrške poljoprivrednoj proizvodnji sa prirodnim i drugim resursima Općine, kao i na povećanje ukupnog broja tržišno orijentisanih proizvođača i povećanje obima proizvodnje.
2. Postojećim stanjem obima i strukture poljoprivredne proizvodnje na području Općine, što je utvrđeno kroz sistematizaciju podataka u prethodnom periodu.
3. Visinom budžetskih sredstava namijenjenih podrškama poljoprivrednoj proizvodnji koja praktično definišu objektivno moguće modele podrške.

Uvode se nove stavke, a odnose se na: nabavku steonih junica, nabavku poljoprivredne mehanizacije i opreme, kao i podršku za gradnju proizvodnih kapaciteta kroz sufinansiranje troškova građevinske dozvole (renta i uređenje). U ovim slučajevima radi se o posebnim mjerama sa ciljem da se podrže poljoprivredni proizvođači koji planiraju proširenje osnovnog stada muznih krava i povećanje proizvodnje mlijeka, nabavku i obnovu mehanizacije za obradu poljoprivrednog zemljišta, kao i gradnju novih proizvodnih kapaciteta-modernizacije i proširenja poljoprivredne proizvodnje.

ALMA OMEROVIĆ - predsjedavajuća

Kazala je da je na sjednici prisutan Admir Kahriman - predsjednik poljoprivrednih

proizvođača Federacije BiH koji se obratio Kolegiju OV-a da prati ovu tačku dnevnog reda, te će se na kraju obratiti.

ALEMA DŽAFO - vijećnica NIP-a

Da li je unazad ovih godina, podsticaj za poljoprivredu podstakao naše građane da se više bave poljoprivredom, odnosno da li se više ljudi prijavljuje za podsticaj?

ADNAN ABADŽIJA - vijećnik NIP-a

Da li može podsticaj za peradarstvo i uzgoj koza?

MERIMA OSMANOVIĆ – pomoćnica načelnika

Imamo preko 1000 registrovanih poljoprivrednih proizvođača i u okviru te grupe imamo registrovane i obrtnike i pravna lica. Dešava se da prilikom raspisivanja javnih poziva od strane Zavoda za zapošljavanje Kantona Sarajevo, pa i Federacije, bude uslov da oni koji će koristiti sredstva od tog Zavoda, odnosno zaposliti se u poljoprivredi, takođe moraju da budu upisani u Registar poljoprivrednih proizvođača. To je cifra cca 1000-1100 poljoprivrednih proizvođača, s tim da imamo i određeni broj pasivnih poljoprivrednika koji se periodično pojavljuju. Ilijaš ima značajan poljoprivrednih proizvođača i značajne proizvodnje.

Što se tiče uzgoja koza - u našem Registru nemamo nikoga evidentiranog kao uzgajivača koza.

Peradarstvo nemamo u ovoj Odluci i nismo imali nekih značajnijih proizvođača, a obzirom da ostvaruju podsticaj kod viših nivoa vlasti, kada uzmemo u obzir raspoloživa sredstva, nismo do sada podsticali ovaj vid proizvodnje.

ALMIR ŠPIODIĆ - vijećnik NIP-a

Pohvalno je da Općina Ilijaš izdvaja ova sredstva za podsticaj u poljoprivredi i smatram da da tu granu, kao općina, imamo kapaciteta razvijati i ubuduće. Naši poljoprivredni proizvođači često imaju problem sa plasmanom svojih proizvoda i u narednom periodu trebamo razmišljati o povećanju podsticajnih mjera, s tim da gubitke koje imaju poljoprivredni proizvođači na neki način namirimo kada ne uspiju da prodaju svoje proizvode. Ministarstvo je ove godine otkupilo velike količine krompira i to je lijep gest. Postoje javne kuhinje, ustanove, kojima treba dati tu hranu i da ne dođemo u situaciju da naši privrednici proizvedu određenu količinu hrane, a onda nemaju plasman na tržištu samo zato što imamo takav system da se može uvoziti sa raznih strana na tržište. Možda bi trebalo podsticaj usmjeriti i za uzgoj koza, ali obzirom da se ne mogu držati na otvorenom, onda je to besmisleno. Podržavam pitanje kolege Abadžije za podsticaj za uzgoj peradi i u narednom periodu razmišljati i o toj vrsti podsticaja.

MEHMED SINANOVIĆ – vijećnik SBB-a

Napravljen je ogroman iskorak kada je u pitanju novčana podrška poljoprivrednim proizvođačima što jasno govori namjeru podržavanja ove grane proizvodnje ukoliko uzmemo u obzir da je prošle godine izdvojeno 300.000,00 KM, a ove godine cca 340.000,00 KM, uzevši u obzir stanje koje je prouzrokovao COVID-19, je za svake pohvale.



## ALEMA DŽAFO – vijećnica NIP-a

Želim spomenuti jedno lijepo dešavanje u Općini Ilidža gdje se ljudima koji se žele baviti poljoprivredom dodjeljuje državno zemljište.

Ako je moguće da se vrši provjera za ljude koji dobijaju podsticaje, jer smo čuli da imamo pasivne poljoprivrednike koji se možda prijave za podsticaj, dobiju ga i onda odustanu, a da pravim poljoprivrednicima možda povećamo sredstva tako što ćemo ovim pasivnim smanjiti, odnosno ukinuti sredstva.

## MERIMA OSMANOVIĆ – pomoćnica načelnika

Vezano za ovu konstataciju, ja sam to rekla za Javne pozive Zavoda za zapošljavanje KS i Federacije koji propisuju kao uslov da je upisan i to ne znači. Ako nemaju proizvodnje, normalno da neće ni povući podsticaj. Dakle, on se vodi u Registru i mislila sam koji je broj poljoprivrednih proizvođača i da svi nisu aktivni upravo zbog toga uslova, recimo ne ostvaruju uopšte podsticaj.

Vezano za Općinu Ilidža – mi smo prošle godine u okviru mjera dodijelili općinsko zemljište koje je bilo na raspolaganju poljoprivrednim proizvođačima.

## HALID DIZDAREVIĆ – vijećnik SDA

Čestitke za ovu Odluku. Općina Ilijaš svake godine uvodi novitete kada je u pitanju novčana podrška poljoprivrednim proizvođačima i ove godine imamo sufinansiranje građevinskih dozvola. Navedno je da 60%, a korisnici nakon dobivene građevinske dozvole će dobiti nakon što dostave dokaz da su uplatili građevinsku dozvolu će moći povući sredstva i ukoliko je moguće da u nekom narednom periodu korisnici uplate ono što je njihov dio, a da Općina Ilijaš uplati ovaj dio što bi trebalo da refundiraju njima nakon uplaćene građevinske dozvole. Slažem se da treba uvoditi novitete i za peradarstvo i za pohvalu je što je dodijeljeno zemljište i KV SDA će podržati ovu Odluku.

## DENIS DILBEROVIĆ – vijećnik SDA

Sve pohvale za učesnike u izradi ove Odluke. Uveli smo ove novitete. Prošle godine smo imali nabavku mehanizacije i opreme, a ove godine smo uveli podršku za steone junice i gradnja poljoprivrednih kapaciteta kroz sufinansiranje građevinske dozvole. Slažem se sa Halidom. Korisnik uplaćuje Općini sredstva, a onda Općina mu vraća 60% tih sredstava. Ako je moguće da korisnik uplati svojih 40% i da dobije građevinsku dozvolu, jer bi to bilo povoljnije za proizvođača, ali ako je po Zakonu.

## AKIF FAZLIĆ – općinski načelnik

Prošli smo kroz sva iskustva kada su u pitanju ove novčane podrške i podsticaj poljoprivredi, pa smo nekada imali situaciju da mi damo, a onda “ganjamo” poljoprivredne proizvođače i to je stavljeno ad acta. Kada donesete građevinsku dozvolu, znači da ste je već platili i dobit ćete refundaciju. To garantuje korektnost i čiste odnose organa općine i poljoprivrednih proizvođača.

Prije tri godine imali smo 800 poljoprivrednih proizvođača, a sada ih ima preko 1000 i to pokazuje da stalno raste broj registrovanih poljoprivrednih gazdinstava i to pokazuje da ovi podsticaji daju rezultate. Ako uđemo u podsticaj za peradarstvo, to su već veliki novci. Opredjeljenje Općine Ilijaš i svih nas kada je u pitanju visina podsticaja uvijek se kreće

između 2 i 3% ukupnog Budžeta i rijetko koja općina ima ovako visok procenat i očekujem da će OV-e podržati ovu Odluku.

MERIMA OSMANOVIĆ – pomoćnica načelnika

Općina Ilijaš na Kantonu Sarajevo izdvaja najveća sredstva za poticaj poljoprivrednoj proizvodnji, a i u Federaciji je jedna od općina koja prednjači u ovom pogledu. Nekada sam vodila evidenciju da naši poljoprivredni proizvođači na sva tri nivoa vlasti povuku blizu dva miliona KM.

ADMIR KAHRIMAN – predsjednik udruženja poljoprivrednika Federacije BiH

Mnogi vijećnici nisu upoznati kako se ostvaruje podsticaj, pa imamo situaciju da se narušava naš ugled. Poticaj na svim nivoima je poticaj po proizvodnji. Molim vijećnike da ne koriste međustranačke stvari da se ne “prepucavate preko leđa” poljoprivrednika. Primjer kada se pogrešno plasiraju informacije. Gospodine Špodiću prošle godine si bio u Vijeću i sa 23 glasa ZA je izglasan poticaj za nabavku mehanizacije. Vijećnik Fahir Hasanović se izuzeo od glasanja radi sukoba interesa, jer je bio u toku nabavke mehanizacije.

ALMIR ŠPIODIĆ – vijećnik NIP-a (poslovnička intervencija)

Tačka dnevno reda je Prijedlog Odluke o novčanim podrškama u poljoprivrednoj proizvodnji na području Općine Ilijaš za 2021. godinu.

Mislio sam da ćete govoriti o aktivnostima Udruženja, međutim, nelogično mi je da me prozivate, nekorektno je.

ALMA OMEROVIĆ – predsjedavajuća

I mi sami često prozovemo ljude koji nisu u ovoj sali. Ovaj čovjek ima potrebu da u ime poljoprivrednih proizvođača govori i da brani njihov ugled i čast, a ovdje su izgovorene riječi koje su narušile njihovu čast.

ALMIR ŠPIODIĆ – vijećnik NIP-a (poslovnička intervencija)

Po Poslovniku mi smo predstavnici građana i naroda. Ovdje iznosimo i prenosimo stavove i mišljenja. Ako neko naruši moj dignitet, autorite i ostalo, dužan sam da ga prijavim i tužim i to se dokaže na sudu. Ne možete paušalno reći da je neko narušio nečiji ugled itd. I naši ugledi se narušavaju i svi mi u nekom dijelu narušavam jedni drugima ugled. Ako sam mahinalo nekome narušio ugled, ja sam uvijek spreman da se izvinem.

ALMA OMEROVIĆ – predsjedavajuća

Sugerisala je da se ne zloupotrebljava mogućnost poslovničke intervencije. Raspravlja se o tački dnevnog reda Prijedlog Odluke o novčanim podrškama u poljoprivrednoj proizvodnji na području Općine Ilijaš za 2021. godinu. Čovjek se referiše i na stvari koje se odnose na ovu Odluku. Zamolit ću vas da čovjek završi, jer nemamo mi pravo ovdje prozivati, a da nam neko ne odgovori. On se obratio Kolegiju OV-a i dozvolili smo da se obrati na sjednici OV-a.

ALAN ŠERAK – vijećnik SDP-a (poslovnička intervencija)

Predstavnici građana, udruženja i sami građani mogu zatražiti od Kolegija da se na sjednici OV-a obrate, kako Poslovnik nalaže, po tačkama dnevnog reda. Ova tačka se zove Prijedlog Odluke o novčanim podrškama u poljoprivrednoj proizvodnji na području Općine Ilijaš za 2021. godinu. Kolega Kahrman, ako nešto imate reći za ovu Odluku recite. Ovo što ste rekli gospodinu Špiodiću, možete se obratiti Kolegiju kada bude Informacija za prošlu godinu za utrošena sredstva. Niste vijećnik i ne znate Poslovnik o radu OV-a. Znači, možete govoriti o ovome što je u Odluci, a ovo što ste govorili šta je bilo u prošloj godini, kada na dnevnom redu bude Informacija za prošlu godinu, najavite se Kolegiju i ako vam dozvole dođite na sjednicu. Sada se o tim stvarima ovdje ne može pričati.

ALMA OMEROVIĆ – predsjedavajuća

Još jednom je zamolila da se ne zloupotrebljava poslovnička intervencija. Čovjek se referiše na nešto što je bilo u prethodnoj godini i nastavlja se i u ovoj godini. Ovdje je izneseno niz netačnih stavova po pitanju ove mehanizacije.

ADMIR KAHRIMAN – predsjednik udruženja poljoprivrednika Federacije BiH

Zahvaljujemo se općinskom načelniku, pomoćnici načelnika Merimi, što u proteklim godinama potiču poljoprivrednu proizvodnju. Prošle godine je bio novitet nabavka poljoprivredne mehanizacije koja se pretvorila u nešto, u “dijeljenje”. Želim kazati da će poljoprivredni proizvođači uz ovu Odluku ponovo investirati blizu million KM. Nećemo dozvoliti da se naša imena prozivaju na takav način da smo mi nešto dobili. Mi smo osobe koje rade. Ovdje nemamo pravo vrijeđanja. Na prethodne dvije sjednice vi ste mene lično uvrijedili. Odluka se svake godine nadograđuje i rezultati su vidljivi. Ono što je planirano, mi smo zadovoljni. Još jednom, nemojte nas etiketirati i govoriti da nam je neko nešto dao. Špiodiću bio si tada u Vijeću, glasao, a onda otišao prozivati da su nekome dati traktori.

ALMA OMEROVIĆ – predsjedavajuća

Pauza prije glasanja od 15:55-16:05 h.

Diskutanata po ovoj tački dnevnog reda više nije bilo, pa je OV-e većinom glasova donijelo

Odluku o novčanim podrškama u poljoprivrednoj proizvodnji na području Općine Ilijaš za  
2021. godinu

Vijećnik Denis Dilberović se izuzeo iz glasanja.

ADNAN ABADŽIJA – vijećnik NIP-a (poslovnička intervencija)

Obzirom da nije bilo nekoliko vijećnika u sali, zamolio bih da se ponovo glasa.

ALMA OMEROVIĆ – predsjedavajuća

Nećemo ponoviti glasanje.

AD-6

Prijedlog Odluke o davanju saglasnosti za raskid ugovora, broj: OPU-IP br.478/17,  
k.č. br.360/13 K.O. Ilijaš Grad i posjedovni list broj:197, K.O. Ilijaš Grad

NIZAMA MALIŠEVIĆ – pomoćnica načelnika

Dala je obrazloženje. U pitanju je prodaja putem licitacije gdje je najpovoljniji ponuđač bio Dovadžija Ahmed sa kojim je sklopljen Ugovor o kupoprodaji. Obzirom da predviđene naknade nisu u predviđenom roku plaćene, a Dovadžija Ahmed se obratio sa molbom za raskid Ugovora iz razloga što nije u mogućnosti dovesti do kraja postupak izdavanja odobrenja za građenje, odnosno nije u mogućnosti platiti određene naknade. Dovadžija Ahmed je pristao na sklapanje Ugovora o raskidu kada OV-e donese predmetnu Odluku.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o davanju saglasnosti za raskid ugovora, broj: OPU-IP br.478/17,  
k.č. br.360/13 K.O. Ilijaš Grad i posjedovni list broj:197, K.O. Ilijaš Grad

AD-7

Prijedlog Odluke o razrješenju člana Općinske izborne komisije Ilijaš  
Senade Hadžimehmedagić

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o razrješenju člana Općinske izborne komisije Ilijaš Senade Hadžimehmedagić

AD-8

Prijedlog Odluke o raspisivanju Javnog oglasa za imenovanje 1 (jednog) člana Općinske  
izborne komisije Ilijaš

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o raspisivanju Javnog oglasa za imenovanje 1 (jednog) člana Općinske izborne  
komisije Ilijaš

Pauza od 16:15-16:30 h.

AD-9

Informacija Sedme policijske uprave - Policijska stanica Ilijaš

KENAN GAČANOVIĆ - načelnik Odjeljenja kriminalističke policije Ilijaš

Razlog mog prisustva na sjednici je spriječenost komandira PS Mirsada Kurspahića da prisustvuje sjednici i ono što je u mom domenu o tome mogu govoriti. U ovoj Informaciji sve je vezano za Zaključak OV-a Ilijaš od 04.02.2021. godine. Ja, kao načelnik Odjeljenja kriminalističke policije mogu reći da sam zadovoljan i znam da ste vi pozitivno ocijenili rad kriminalističke policije i zahvalan sam na tome i stojimo vam na raspolaganju. Što se tiče ove Informacije da li je trebala biti ovako koncipirana ili ne, ne znam, jer nisam bio na sjednici 04.02.2021. godine, a načelnik PS će iduće sedmice biti tu i pismeno se možete obratiti.

Mogu reći da u prva četiri mjeseca imamo smanjen procenat krivičnih djela.

HALID DIZDAREVIĆ - vijećnik SDA

Gospodine Kenane sami ste rekli da ovo nije iz vašeg domena i ne možete odgovoriti na naša pitanja. Dolazite iz kriminalističkog odjeljenja koje smo mi, svi vijećnici, pohvalili na februarskoj sjednici, gdje smo Informaciju odbili i donijeli jednoglasno Zaključak da se ta Informacija dopuni zajedno sa pitanjima koja su postavili vijećnici. Mi ovdje imamo materijal koji se zove Informacija, a mi smo tražili da se dopuni Informacijama sa odgovorima. U ovom materijalu koji nam je dostavljen, a vi Gačanoviću niste odgovorni za tu vrstu priče i žao mi je što ovo uopšte morate slušati. U Informaciji je dostavljen odgovor možda na 40% pitanja. Većina vijećnika je postavljala pitanja, ali tih odgovora u ovoj Informaciji nema. Moje ime i prezime apsolutno ne postoji u ovoj Informaciji. Također, kolege koje sjede sa moje desne strane su mi rekli da nema ni njihovih odgovora. U uvodu kod usvajanja dnevnog reda, kolege su već diskutovale o ovome, a ja nisam, ali rekli su činjenicu da zaista ovo na neki način vrijeđa Općinsko vijeće, jer kada OV-e traži da se upotpuni Informacija i dobije ovakav odgovor, zaista ne znam da li ima smisla ponovo postavljati pitanja. Ovaj materijal smatram apsolutno nepotpunim i s tim u vezi neću postaviti niti jedno pitanje Vama, jer ne možete odgovoriti, neću postaviti ni pismeno pitanja, jer sam već postavio sva pitanja na sjednici u februaru, nisam dobio odgovor i u svoje lično ime i u ime KV SDA ne prihvatam ovu Informaciju i tražim da se Zaključak sa februarske sjednice ponovi tj. da postupite po Zaključku koji smo tada donijeli jednoglasno. Ovo nije politički, nego proceduralno, poslovničko i ako ima potrebe ja ću pročitati Zaključak koji glasi:

"Općinsko vijeće Ilijaš, nakon detaljne analize sadržaja Informacije o stanju sigurnosti na području općine Ilijaš za 2020. godinu, uz izuzeće zavidnih rezultata rada Odjeljenja kriminalističke policije Ilijaš, istu ocjenjuje nepotpunom, te je kao takvu, odbacuje.

U skladu s navedenim tražimo, da se u roku od 30 (trideset) dana, Informacija o stanju sigurnosti na području općine Ilijaš za 2020. godinu, dopuni podacima koji odražavaju realno stanje na terenu, te odgovorima na postavljena pitanja vijećnika, postavljena tokom sjednice održane 04.02.2021. godine.

Općinsko vijeće Ilijaš, smatra da je nerealna ukupna količina sankcionisanja građana u vezi s epidemiološkim mjerama za razliku od drugih općina u Kantonu Sarajevo".

Nakon te sjednice imali smo period loock downa, imali smo period totalnog haosa u Kantonu Sarajevo kada je u pitanju virus Covid-19 i situacija u javnom zdravlju je bila katastrofalna, nakon toga smo prešli na on-line sistem održavanja sjednica OV-a i iz tog razloga vi niste u roku koji je dat od strane OV-a dostavili informacije koje su tražene od strane OV-a. Za period od 04.02.2021. do 27.05.2021. godine, smatram da ste mogli naći za shodno da odgovorite konkretno na pitanja. Zaista je mučno da se stalno ovo povlači po dnevnom redu.

ADNAN ABADŽIJA - vijećnik NIP-a

Mi ispred NIP-a smo imali informaciju na prvoj sjednici kada je prisustvovao komandir PS i mislim da smo imali sve informacije, detalje, brojke i statistiku za prošlu godinu, ali nije bilo jednoglasno, bilo je nekih kolega koji su bili suzdržani ili su bili ZA. Što se tiče Informacije, danas imamo odgovore koji su sačinjeni u policijskoj stanici. Predsjedavajuća, vi ste rekli i predložili da će se organizovati tematska sjednica po ovom pitanju i zakazati u narednom

periodu, pozvati relevantne osobe iz VII PU i mi smo na tom fonu očekivali da će se organizovati tematska sjednica. Komandir Gačanović nije bio tada tu, sada da postavljamo opet pitanja mislim da nema smisla, a na početku sam predlagao da se ova tačka skine sa dnevnog reda i da na tematskoj sjednici razgovaramo o detaljima u protekloj godini i svim dešavanjima ili da se ova tačka stavi na dnevni red drugi put. Napominjem da je u tom periodu bilo dosta slučajeva kažnjavanja građana od strane policijskih službenika, jer im je takav nalog izdat i oni su radili svoj posao. Predlažem da se ovo povuče sa dnevnog reda, prihvatamo ono što je bilo u prvom momentu, ako ima još nekih informacija da se dopune, ali na onaj način kako smo dogovorili.

ALMA OMEROVIĆ - predsjedavajuća (replika)

Donijeli smo Zaključak u kojem smo tražili da se u roku od 30 dana Informacija dopuni podacima koji odražavaju realno stanje na terenu, došle su nove mjere zabrane i na Kolegiju sam dala obrazloženje zašto nismo tu tačku predložili, jer nismo ni znali kako će funkcionisati sjednica i to je jedini razlog zašto smo ovu tačku ostavili za danas. Ono što ste govorili na dnevnom redu, mislim da smo većinom glasova usvojili Zaključak i govorim ovo u smislu da ne bi smo osobu iz PS danas izlagali određenim poteškoćama za šta nije zadužen, a vjerujem da će komandir doći na slijedeću sjednicu i da ćemo imati potpunu Informaciju. Mislim da je kolega Špiodić kazao (oprostite ako griješim) da Informacije nije u onom obliku kako je trebala biti, nego da su to odgovori na pitanja. Ne treba puno vremena da ostavljamo za diskusije, jer smo svi na istom fonu. Znači, da ponovo uputimo Zaključak i da u roku od trideset dana, odnosno za slijedeću sjednicu OV-a dostave ono što smo tražili.

ALMIR ŠPIODIĆ - vijećnik NIP-a

Mi ćemo ovu Informaciju vraćati i odbijati sve do momenta dok ne dobijemo odgovore sa kojima smo mi zadovoljni, bez obzira da li nam te odgovore neko može dati ili ne može, na način da svi mi budemo zadovoljni, jer tako mi izgledaju prethodne diskusije. Što se mene lično tiče i mojih kolega, ja sam dobio odgovore na moja pitanja. Odgovora je bilo i na samoj sjednici, a da li se nekome sviđaju ili ne, to je nešto drugo. Žao mi je što sam podržao Zaključak koji je Halid pročitao. Ono oko čega smo se svi složili jeste da je u tom periodu bilo previše rigoroznih mjera prema građanima Ilijaša u smislu pisanja kazni za maske. Sve ostalo što ste naveli u tom Zaključku ja nisam u tom momentu najbolje razumio i ne bih ga podržao, a sada se kajem i izvinjavam se predstavnicima VII PU koji u bili tada i generalno čitavom kolektivu. Zašto? Oni nama dostavljaju informacije onakve kakve imaju. Mislim da oni nama ne lažiraju ove informacije. Dostavljaju informacije, brojke, statistike, takve kakve jesu. One su neumoljive. Da li su napravili grešku? Jesu. Da li smo imali pravo postaviti pitanja zašto se to desilo? Jesmo. Mislim da nema potrebe za ponovnim maltretiranjem nas, Vijeća i predstavnika VII PU, da nam ponovo dolaze i da ih ponovo preispitujemo. Ko želi da postavi neko pitanje ili da mu nije odgovoreno, to može uraditi kao vijećničko pitanje ili inicijativu prema VII PU kao i sva ostala vijećnička pitanja i inicijative.

Vezano za ovu Informaciju, nisam shvatio da nas je gospodin Mehmed Sinanović, komandira VII PU i sve nas koji nismo bili na strani njegove političke opcije, pa i građane Općine Ilijaš koji nisu podržali tu političku opciju, nazvao "necivilizovanim i malicioznim" kako stoji u ovom pitanju. Bilo bi korektno da se kolega Sinanović izvini (ne meni, mene ne možete uvrijediti), građanima koji vas nisu podržali ili su protestovali protiv vas. Ne možete i ne dozvoljavam da građane, komandira i VII PU nazivate da su bili saučesnici

u predizbornim, postizbornim aktivnostima, da ih etiketirate i nas i mene da etiketirate i mislim da je korektno da se izvinete za ove izgovorene riječi. Da li ste to uradili svjesno ili ne svjesno, ne znam. Rekli ste da je komandir podržao "necivilizovane, maliciozne pokušaje destrukcije njegove neprikosnovene reputacije" (misli se na načelnika) i misli da da je komandir saučesnik dešavanja spontanih protesta u vrijeme izbora i poslije izbora.

HALID DIZDAREVIĆ - vijećnik SDA (replika)

Sve sugestije koje sam iznio su se odnosile na dokument koji imamo pred sobom. To što ste vi glasali i što ste pogriješili u tom glasanju, žao mi je kolega Špiodiću. Ubuduće vodite računa kako glasate i glasajte kako smatrate da treba, jer to je vaše pravo. Isto tako, moje pravo je da postavljam pitanja, a da odgovore oni kojima se pitanja postavljaju. Rekli ste da ćemo mi ovdje postavljati pitanja sve dok ne budemo zadovoljni odgovorima. Nisam rekao da sam nezadovoljan odgovorima, nego nisam dobio odgovore i ne samo ja, nego većina vijećnika nije dobila odgovore. Ovaj dokument nije politika. Razumijem vas da imate potrebu da se javite, da diskutujete, pa da imate broj vaših javljanja itd. Međutim, suština onoga što sam rekao je slijedeća: ovaj dokument koji imamo pred sobom i ako ovo prihvatimo, a ovdje piše Informacija, na četiri lista, polovično odgovorena pitanja i ja to ne mogu prihvatiti. Uvažavajući gospodina koji je ovdje, pohvalili smo, pročitao sam Zaključak i ako ovaj dokument ima elemenata da poštuje Zaključak koji smo donijeli, kao Vijeće, dajte da glasamo, odnosno da prihvatimo.

ADNAN ABADŽIJA - vijećnik NIP-a (poslovnička intervencija)

Po Poslovniku, ne moramo se izjasniti za Informaciju, primili smo je k znanju, čestitamo pripadnicima VII PU i na odgovorima koje su nam dostavili i mislim da je to sasvim dovoljno da ljude ne maltretiramo. Ako želite postaviti pitanja VII PU, to možete uraditi, ali što se tiče KV NIP-a dobili smo odgovore na pitanja i zadovoljni smo.

ALMIR ŠPIODIĆ - vijećnik NIP-a (replika)

Kolega Halide, mislim da smo otprilike na istom fonu. Nisam ja ni u kom slučaju iznio tvrdnje kako to vi sada prezentirate. Ovo nije potpuna Informacija, ovo je dopuna Informacije. Ljudi su nam odgovorili pismeno na postavljena pitanja, a možda nisu odgovorili svima. Sa ovom dopunom Informacije sam zadovoljan. Ako vi smatrate da niste, dobro znate kako se ja referišem kada ne dobijem tačne odgovore ili kada uopće ne dobijem odgovore na postavljena pitanja i inicijative generalno i od službi i institucija. Ja ponovo pokrećem pitanja, insistiram i tražim da dobijem bilo kaka odgovor. Isto to imate pravo kao vijećnik i potpuno vas podržavam. Zaista nemam potrebu da se dokazujem da sam aktivan vijećnik i to se prepoznalo na prethodnim izborima sa podrškom od 1000 glasova.

ALAN ŠERAK - vijećnik SDP-a

Ova Informacija je ono što smo mi Zaključkom tražili dopunu Informacije gdje smo postavili niz pitanja. Sada, da li smo mi zadovoljni formom Informacije ili nismo, to je neka druga stvar. Lično sam zadovoljan što sam dobio odgovor na postavljena pitanja, ali nisam zadovoljan da se radi o neiskrenom odgovoru. Zašto ovo kažem? Zato što sam dobio informaciju od visokopozicionirane osobe vaše policijske uprave gdje su rekli da zvaničan zahtjev nije došao od jednog političkog subjekta niti za skup niti za vatromet, a isto tako u

MUP-u Kantona Sarajevo u administrativnom odjelu koji dozvoljava i daje saglasnosti za upotrebu pirotehničkih sredstava nije bio upućen zahtjev, ali o tom po tom, bilo što je bilo. Na neki nači, mi ovdje sada trebamo završiti ovu priču. Jasno je da imamo svi "uzavrele" glave, pogotovo iz razloga što smo svi malo kivni zbog skupova koji su se dešavali pred zgradom Općine Ilijaš. Ne vidim razloga da kontinuirano vraćamo Informaciju. Doći ćemo u situaciju da ćemo sastaviti prošlogodišnju sa ovogodišnjom Informacijom. Smatram da ovo trebamo prihvatiti kako jeste tj. primiti k znanju, a sva eventualna pitanja na koja niste dobili odgovore, sačekajte priliku kada dođe komandir i njemu postavite. Sada je nekorektno da gospodina Gačanovića propitujemo o nekim stvarima koje su van njegove nadležnosti.

Vama čestitam za rad u ovom vašem Odjelu, ali želim da vam skrenem pažnju da morate pomoći Upravi za šumarstvo kada je u pitanju nelegalna sječa šume na području Općine Ilijaš. Ogromnu štetu nam prave ljudi koji nelegalno sjeku šumu i tu od vas očekujem da se malo više angažujete kako bi ljudima pomogli da spriječe tu vrstu pojava.

Imali smo danas jednu inicijativu i zamolit ću vas da zapišete i prenesete komandiru Kurspahiću, a to je da imamo pritužbe od strane građana uslovno rečeno "gornjeg kraja" da je već više od godinu dana ukunuta redovna policijska patrola koja se nalazila na tom području. Izgleda da u zadnjoj godini dana radite samo intervencije na način kada se gore desi određeno krivično djelo, vi uputite patrolu iz Ilijaša da ode gore i uzme izjave. Zna i sami koliko vremena treba ljudima da dođu gore ne bi li na neki način pokušali spriječiti djelo koje se gore izvršava. Još jednom ću vam skrenuti pažnju i zamoliti da pokušate iznaći rješenje ili se pokušati organizovati da gore imamo prisutnu jednu patrolu u toku cijele godine, jer ljudi na "gornjem kraju" koja je 4/5 površine Općine Ilijaš treba da ima, ako ništa, jednu patrolu, a da ne govorim da bi gore trebala jedna policijska stanica.

#### SEID BEKTIĆ - vijećnik SDA

Što se tiče Informacije nisam zadovoljan, nema odgovora na pitanje koje sam uputio komandiru, a ja sam mu prezentovao i dokumentaciju kada su u pitanju i skupovi ispred zgrade Općine Ilijaš. Ono što hoću da kažem sada i što sam htio da kažem na toj sjednici je slijedeće: ja sam na strani građana Ilijaša i zbog prekomjerne upotreba sile koja je bila u tom periodu ne mogu prihvatiti Informaciju. Ne možemo ovdje govoriti da smo uz građane, a ne suosjećamo sa socijalno ugroženim osobama kojima su pisane kazna u iznosu od 500,00 KM i koji u roku od osam dana kada plate tu kaznu njima je puno 250,00 KM, a na području Ilijaša smo imali čak i osobama koje imaju papire da su neuračunljive pisane su po 2-3 puta te kazne. Ja ne mogu podržati Informaciju da dođe i Komesar MUP-a Kantona Sarajevo i ministar policije i ne razumijem da će neko podržati Informaciju, a da smo kažnjavali građane Ilijaša pogotovo starije osobe koje iz nekih razloga nisu mogli nositi masku.

#### HALID DIZDAREVIĆ - vijećnik SDA

Slušajući prethodnike, a imajući u vidu moju prvobitnu diskusiju, neću da budem neko ko će na bilo koji način ometati rad OV-a. Mučno je svakako da nam svako mjesec, dva, dolazi Informacija, ovo što kaže kolega Šerak, nema ni smisla da ide dalje ova Informacija da se godinu dana proteže kroz OV-e. Međutim, poslati gospodina Kenana koji je je šef Odjeljenja kriminalistike, koji je dobio pohvalu, gospodina nemam šta pitati i neću pitati ni usmeno ni pismeno. Tražim da mi se dostave informacije i odgovore na pitanja za sve vijećnike koji su tada postavljali pitanja. Nisam rekao da ću biti nezadovoljan odgovorima, nego tražim samo da mi se odgovori i ništa drugo. Mi ćemo svakako prihvatiti tu



Informaciju kakav god odgovor bude. Dakle, to je suština i suština je da se dostave odgovori na pitanja koja su vijećnici postavili, bez obzira da li će biti zadovoljni odgovorom ili ne, bilo ko da je u pitanju ovdje. Ne možemo selektivno birati pitanja koja odgovaraju i odgovarati na ista i dostaviti nepotpunu Informaciju. Što se mene lično tiče, nemojte da imamo više ovu tačku dnevnog reda, nećemo je skidati, ali tražim da mi se odgovori na pitanja i ne moramo je čak ni diskutovati više, prihvatit ćemo je i suština je to.

SEID BEKTIĆ - vijećnik SDA (replika)

I ja sam za to da se ova tačka ne donosi na OV-e, da ovu Informaciju odbacimo ili da je primimo k znanju i da ne raspravljamo o tome. Jednostavno, trebamo se suosjećati sa građanima koji nisu u imućnoj situaciji, a morali su platiti kaznu bojeći se da idu na Sud. Ono ispred zgrade Općine Ilijaš me više ne zanima, to smo već raspravljali, ali zanima me to da smo građane kažnjavali, a ovo nije vojna država, nije policijska i ne treba da se tolika sila primjenjuje. Mislim da se moglo ići sa upozorenjima građanima za nošenje maske.

ALMA OMEROVIĆ - predsjedavajuća

Na fonu diskusija kolega, ja sam čak razumjela da ste na početku sjednice bili spremni da skinemo ovu tačku sa dnevnog reda zbog nezadovoljstva. U međuvremenu sam saznala da neće doći komandir, nego gospodin Gačanović i nema potrebe da ga maltretiramo i kao što je kolega Halid rekao nije nam cilj da na svakoj sjednici OV-a imamo ovu tačku dnevnog reda, već isključivo da se vijećnici ispoštuju i ako smo zajedno donijeli Zaključak, sada smo promijenili mišljenje i to je lično pravo svakog vijećnika. Koliko sam shvatila, kolega Halide odustajete od Zaključka koji ste prethodno pročitali.

HALID DIZDAREVIĆ - vijećnik SDA

Odustajem od Zaključka da se ponovo nađe tačka dnevnog reda Informacija o stanju sigurnosti na području općine Ilijaš za 2020. godinu na slijedećoj sjednici uz konstataciju koju sam rekao da se svim vijećnicima dostave odgovori na pitanja, jer mi svi ovdje isto vrijedimo.

ALMA OMEROVIĆ - predsjedavajuća

Znači, sve što se tiče ove tačke dnevnog reda dostaviti komandiru i nadam se da će adekvatno ispoštovati svakog vijećnika.

Diskutanata, po ovoj tački dnevnog reda više nije bilo, pa je OV-e primilo k znanju

Informaciju Sedme policijske uprave - Policijska stanica Ilijaš

Nakon što je iscrpljen dnevni red, predsjedavajuća Alma Omerović zaključila je 6. sjednicu Općinskog vijeća Ilijaš u 17:00h.

Zapisničar:

Maida Habibović

PREDSJEDAVAJUĆA  
OPĆINSKOG VIJEĆA ILIJAŠ  
Alma Omerović, BA nov.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:160200000710645  
e-mail [ov@ilijas.ba](mailto:ov@ilijas.ba)

